







舊京瑣記













舊京瑣記

枝巢子著

純文叢書 28

舊京瑣記引

余以戊戌，通籍京朝。日月不居，忽逾一世。滄桑數變，逢此百憂。鬢髮已摧，名業未立。華鎗照夕，明鏡窺晨。謂可以已，復何言哉！迴憶年時，如隔夢寐。鷓鴣巢既營，菟裘將老。端居鮮事，何以送日。不爲無益，奚遣有涯。檢書懼勞，耽吟嫌苦。出畏風日，臥損骨骼。小人閒居，君子所惜。越吟未忘，北籍將注。空桑三宿，尙復有情。夢華一篇，況乃異代。初爲卑官，多習鄙事。不棄長老，時獲逸聞。歲月滋多，胸臆遂積。重以改革，凡百變更。公羊三世，隍鹿一夢。及今所述，已爲陳迹。告諸後生，或疑誑汝。暇則趨錄，著之簡篇。鐘鐺已往，懷哉舊京。薦紳羞言，是曰瑣記。若其大者，有史官在。都爲一集，類分十

門。陳詩觀風，入國問俗。輦轂所臨，政教斯出。末習虛僞，初乃淳朴。匪曰勸懲，美惡並錄——記習尚第一。南北殊音，非變則俟。車書既一，言亦宜之。往往合古，是曰可師。其尤雅者，或入於詩——記語言第二。名士談兵，終以兒戲。清流植黨，末乃市肆。一蟹不如，彼貊亦是。孰爲老成，寧不殄瘁——記朝流第三。宮禁事秘，孰明眞際。世俗所傳，多出懸臆。紂之不善，或不如是。書其可徵，以告後世——記宮闈第四。五帝弗沿，三王不襲。叔通修儀，始自綿蕪。華夷雜糅，論者所惜。然亦燦然，賢於廢棄——記儀制第五。英雄入彀，雄主所樂。乃其流弊，才智並錮。與謂求賢，寧去付縛。絙絕紐解，亦遂不國——記考試第六。舉史十七，泰半女戎。不在顯臬，蕭牆自封。宵小搆之，禍亂是叢。國本再絕，天祿永終——記時變第七。銅狄坐移，金仙淚枯。腹痛西州，感逝黃墟。泱泱大邦，自遼建都。阿房蕪城，覽者鑑諸——記城廂第八。爭名於朝，爭利於市。不龜手藥，千金可致。歌管沸天，閭閻撲地。君子於此，可以覘世——記市肆第九。北地胭脂，南都黛螺。燕蘭史散，板橋記訛。今我不樂，對酒當歌。張

魁蕭聲，聞之奈何——記坊曲第十。

枝巢子述

舊京瑣記引

三

舊京瑣記

發凡

- 一、是編僅就一時記憶所及，筆之於書。他日復有所憶，或更爲續記。
- 一、是編所記，不免謬誤。或當日聞焉弗詳，見焉弗審。嚮壁虛構，則非所敢。
- 一、所記斷自清同光以來，其非見聞所及者，有昔賢之紀錄在，寧闕焉。若徵引舊聞，不在此例。

- 一、是編名曰舊京，應至清末而止。新代逸聞，自有大手筆在，弗驛入也。
- 一、是編多昔年朋談燕罷，篝燈所錄，時代不同，近甫次而成篇。其中稱謂，或取法於民國所修之清史稿，或比擬於花村看行侍者之談往。春雜之譏，所不能免。

一、是編所記，特刺取瑣聞逸事，里巷俳談，爲茶餘酒後遣悶之助，間及時政潮流，亦取其無關宏旨者。

目錄

卷一	習尚	一
卷二	語言	二
卷三	朝流	七
卷四	宮闈	三
卷五	儀制	三
卷六	考試	五
卷七	時變	六
卷八	城廂	七
卷九	市肆	八
卷十	坊曲	九
附：校讀後記（何凡）		

舊
京
瑣
記

卷一 習尚

都人習見官儀，多講禮貌，周旋應對，往往中程，然其弊也僞。風氣剛勁，不屈不撓，勇於赴義，重名知恥，然其弊也狠。顧本性多近質實，常見故家老輩，其接子弟後進，禮倨而詞直，貌嚴而情親，尚不失先民矩範，迨末季漸澆漓耳。

婦女見客，匪特旗族爲然，土著亦有之。門生謁師，固無不見師母者。親戚至，無不見家人者。余初北來，詣一遠戚，乃其家閨中之人咸集，若者姪姨姊妹，固夙所未知也。然一片嚶嚶問好之聲，推本身以及南中之家人，一一都遍。實則余家人，固夢寐中不知有此戚也。彼輩亦不知余家究有何人，特臆想而遍詢

之，謂匪是弗親耳。昔見笑劇，有不相識之人，乍見而呼曰：『趙。』答曰：『非趙。』『然則錢。』曰：『無錢。』曰：『若是，則孫三爺。』曰：『余無弟兄。』又有初會者，見面極親，問其尊親好，自家人以逮鷄犬，終則曰：『貴姓？』殆此禮作俑歟？

交際場中，亦多虛偽之風。昔於筵中晤一人，談悉爲世交。彼則極意周旋，堅約來日一飲。既而曰：『明日有內廷差，後日如何？』方遜謝，彼已呼筆書柬，議地議菜，碌亂不已。席將終，彼忽拍膝曰：『後日有家祭，奈何？』他客爲解曰：『相見正長，何必亟亟。』余惡其擾，亦謝曰：『此月中鄙人方有俗冗，得暇再趨擾耳。』後終不晤。友人云：『彼之延飲，面子也。君應遜謝，亦面子也。君竟不堅辭，彼祇有自覓臺階以下耳。』

貴族之家，文勝於情。新婦問安視膳，但有侍立。妾媵亦然。命坐但有矮几，弟跪於前，兄微引手而已。夫妻間禮貌亦隆。昔聞溥仲露尙書於其夫人生辰，恭具冠服，童僕持禮品先之。至夫人許，高唱曰：『老爺來拜壽，夫人出迎。』

互請安道謝，肅坐進茗，寒暄而退。尙書生日，夫人禮亦如之。遇年節亦然。

親戚獲而遠骨肉，講過節而無真意，舊家之通病也。樂與仕宦交，好習官樣，平民之通病也。至於好俠尙義，急人之急如其私，轉在社會中之卑賤者，其殆古燕趙之遺風歟？

喜遊覽，婦女尤甚。正月最繁，所謂六部燈也，廠甸也，火神廟、白雲觀也，按時必至。春初，則出郊外，曰看青。六月，則南薰門外之南頂，永定門外之中頂，各有會。植旛、使叉，秧歌、花鼓。演者率爲子弟，觀者奔波遠來，揮汗相屬。大抵四時有會，每月有會。會則攤肆紛陳，士女競集，謂之好遊蕩可，謂之昇平景象亦可。

嬾惰之習，亦所不免。順天府志謂：民家開窗面街，炕在窗下。市食物者以時過，則自窗遞入。人家婦女，匪特不操中饋，亦往往終日不下炕。今過城中曲巷，此制猶有存者。熟食之叫賣，亦如故。

貴家子弟，馳馬試箭，調鷹縱犬，不失尙武之風。至於養魚鬪蟀，走票糾賭，

風斯下矣。別有坊曲游手，提籠架鳥，拋石擲彈，以爲常課。鳥則有紅殿壳、藍殿壳、鵲鵲之類，調護珍惜，諡爲鳥奴。玩日愒月，並成廢棄，風尚之最惡者。

四時之禮，多重報本，而迷信亦甚。清明、中元與十月一日，必掃墓，男婦皆往焉。冬至，滿人必祭堂子，植竿於庭而燎祭焉。稍有力者，必用全豬羊。祭畢，招親友會食於庭，曰喫克食，必盡爲度。漢人則否。立春日，各按年歲之多少，捻紙浸油燃之，曰順星。新年既過，則具酒肉而加餐焉，曰添倉。

正月之燈，向集於前門內之六部，曰六部燈，以工部爲最。有冰燈，鑲冰爲之，飛走百態，窮極工巧。亦扮雜戲，有役閭姓者，能演判官，立獨杠上，爲種種姿式，呼之爲閻判。殆亦黃胖、游春之遺歟。庚子亂後遂廢。燈市舊集於東西四牌樓，後始移廊房頭條。

中元亦有燈，多作蓮花形，或摺爲蓮瓣，集成禽鳥狀。或采巨蒿，懸香於上燃之，密如繁星，燦如火樹，謂之蒿子燈，昔人有作蒿燈曲者。里巷小兒百十爲羣，各持蓮花燈而舞，亦頗有致。

鬪蟋蟀場多在順治門外。飼蟲者，亦謂之把式。水食調養，各有師傳，受酬甚豐。養蟲之盆，有一枚值百十金者，以趙子玉所作爲最良，蓋乾嘉時人也。開場則門懸紅彩，車馬咸集，上流人士，往往與焉。勝負之數頗鉅，一鳴驚人，賀者交集。

飲食以羊爲主，豕佐之，魚又次焉。八九月間，正陽樓之烤羊肉，都人恆重視之。熾炭於盆，以鐵絲罩覆之，切肉之薄，蘸鹽醬而炙於火，其馨四溢。食肉亦有姿式，一足立地，一足踞小木几，持箸燎肉，傍列酒尊，且炙且啖且飲。常見一人食肉至三十餘拌，拌各肉四兩。飲白酒至二十餘瓶，瓶亦四兩。其量可驚也。水鮮惟大頭魚、黃魚上市時一食之，蟹亦然。如食某魚時，則舉家以此爲食，巨家或至論擔，但食此一種，不須他饌，亦不須麵或餅。

飯以麵爲主體，而米佐之。本京人多喜食倉米，亦謂之老米。蓋南漕入倉，則一經蒸變，卽成紅色，如蘇州之多秣然，煮之無稠膏，病者爲宜。

蔬果之屬，以先時或非時爲貴。香椿、雲豆、菱、藕之類，皆是也。有所謂

洞子貨者，蓋於花洞中，熏培而出，生脆芳甘，其價尤鉅。王瓜一莖，食於歲首，或值一二金。戚家蔣氏，昔爲御果商，方其盛時，以王瓜作饋歲之品，一盤之價，至數十金，幾致破產。至今人呼曰「王瓜蔣」云。

衣著之宜，舊家必衷禮法，謂之款式，亦曰得樣。大抵色取其深，以塵土重，淺色不耐浣也。非京式者，謂之怯。近奇邪者，謂之匪。人皆非笑之。士夫長袍，多用樂亭所織之細布，亦曰對兒布。堅緻細密，一襲可衣數歲。外褂則多爲江綢，間用庫緞。文錦記者，良綢皆團花，初用暗龍，後乃改用拱璧、漢瓦、富貴不斷、江山萬代之類。馬褂長袖者曰臥龍袋。有中作半背形，而兩袖異色者，滿人多著之。半背曰坎肩，其前襟橫作一字式者，曰軍機坎。亦有用麕鹿皮者。仕宦平居多著靴，嫌其底重，乃以通草製之，亦曰篆底。後乃改爲薄底，曰軍機跑。便帽曰秋帽。以皮爲沿者，曰困秋。中淺而缺者，曰兔窩。軟胎可摺疊入懷者，曰軍機六折。大抵滿官研究衣著，每解衣，則零星佩飾，攤滿一案。漢官則否。

婦女衣裙顏色以年歲爲準。金繡淺色之衣，唯新嫁娘或閨秀服之。一過妙齡，卽以青藍紫醬爲正宗矣。衫袖腋窄而中寬，謂之魚肚袖。行時飄曳，亦有致。後乃慕南式而易之，則又緊抱腕臂，至於不能屈伸。旗漢裝無不綁腿者，以地氣寒也，其帶則平金繡花，爭奇鬥靡。棉袴則秋深已著，春盡始去，殊損嫵娜之致。庚子後漸同南化，然本質不易也。

舊日乘坐，皆騾車也。制分多種，最重者府第之車，到門而卸，以小童推之而行。出則御者二，不跨轆，步行於兩旁，健步若飛，名之曰雙飛燕。次曰大鞍車，貴官乘之。京堂以上，障泥用紅，曰紅拖泥，自餘皆綠色油布圍之。曰官車，尋常仕官乘之。曰站口車，陳於市口以待僱者。曰跑海車，沿途招攬坐客。車輪亦有別，曰山西較者（京語呼輪曰較），來自晉，輪皆有齒。曰伏地西較者（京語本地曰伏地），本地仿西輪爲之，唯無齒。曰夯較者，斯下矣。

京師屋制之美備，甲於四方。以研究數百年，因地因時，皆有格局也。戶必南向，廊必深，院必廣，正屋必有後窗，故深嚴而軒朗。大家入門，卽不露行，

以廊多於屋也。夏日，窗以綠色冷布糊之，內施以捲窗，晝捲而夜垂，以通空氣。院廣以便搭棚，人家有喜慶事，賓客皆集於棚下。正房必有附室，曰套間，亦曰耳房，以爲休息及儲藏之所。夏涼冬煖，四時皆宜者是矣。

中下之戶曰四合房，三合房。貧窮編戶，有所謂雜院者，一院之中，家占一室，萃而羣居，口角奸盜之事出焉。然亦有相安者，則必有一人焉，或最先居入，或識文字，或擅口才，若領袖然。至於共處既久，疾病相扶，患難相救，雖家人不啻也。

京人買房宅，取租以爲食者，謂之「喫瓦片」。販書畫碑帖者，謂之「喫軟片」。向日租房招帖，必附其下曰「貴旗、貴教、貴天津免問」。蓋當時津人在京者，猶不若近時之高尙，而旗籍回教，則人多有畏之者。

都中土著，在土族工商而外，有數種人，皆食於官者。曰書吏，世世相襲，以長子孫。其原貫以浙紹爲多，率擁厚資，起居甚侈。夏必涼棚，院必列磁缸以養文魚，排巨盆以栽石榴。無子弟讀書，亦必延一西席，以示闊綽。譏者爲之聯

云：「天棚魚缸石榴樹，先生肥狗胖丫頭。」其習然也。曰庫丁，役於戶部，侵盜多致鉅富。每歲挑庫丁時，行賄之數可驚。然恆爲匪徒搶綁，勒贖鉅資，謂之搶庫丁。故出入恆以多人護焉，此輩謂之保庫丁。曰吃倉，又謂之倉匪，或謂之倉老鼠。一役身後，往往百數十人。鼠雀之耗，可知矣。曰長班，有二類：曰科分，曰會館，亦子孫相襲。自各部裁書吏，銀行代金庫，南漕絕迹，科學既停，此輩皆失所，惟會館之長班猶在。

「帶子會」者，社會互助之良法也。入會者，率爲工業平民。或自顧衰老，或家有老親，月納微資，猝有死亡，報之於會，則殮事畢備。至於鼓樂棚槓，以迄庖茶奔走，皆會員也。人各繫一白帶，故曰帶子會。

「窩窩頭會」者，始於清末，慈善團體之一也。京師貧民，捋黍屑，蒸而食之，曰窩窩頭。此會專爲救濟貧民，故以名焉。集資於衆，不足，則演義務戲以充之。不僅賑饑，兼籌禦寒。改革後，故家失業，貧況可駭，有綴報紙爲衣者，有夫婦共一袴者，每及冬令，凍餒途斃，無日無之，皆得於會中之報告。故侯拉

車，猶爲有力，可慨矣。

裝飾婦女，聘賣於異鄉人，乘隙捲而颺焉，謂之「放鷹」，亦曰「打虎」。設爲賭局，誘騙愚懦，謂之「腥賭」。代接婦女，秘密賣淫，謂之「轉當局」。引誘富家子弟遊蕩、嫖賭，以博其資，謂之「架秧子」。皆社會不良之風俗。

富貴人家多信佛，故僧道之地位甚高。子弟往往拜僧爲師，求其保護。甚有以子息艱難，恐難長養，而購一貧家兒，令其爲僧者，謂之「替身」。他日被替之子長成，此替身僧人，若其弟兄然，舉家敬禮之。

他處僧人，卽有冶遊，亦須秘密。都下僧人，則公然行之，曾無媿色。

疾病療治，多信針灸。醫生識字者少，溫證之溫，皆書作瘟疫之瘟，弗怪也。又有蒙古大夫者，尤可危。

針灸無良師，每以待詔行之。亦有得秘傳者，往往而驗。此外又有業傷科者，名曰按摩，又名曰摧膊。有箍桶劉者，最有名。

卷二 語言

北京音無入聲，凡入聲之字，皆轉入平上去三音，此人所習知也。然有一音而變數字者，如六、祿、陸、綠，均爲入聲，南人讀之，一音也。京音則數目之六，讀如溜；姓氏之陸，爵祿之祿，均讀如路；顏色之綠，讀如慮。凡如此類，不可枚舉，初學京音，往往而誤。

有一字而分兩意者，如你我之你，遇平行以下可直呼你，爾汝意也。然遇尊長，則必曰您，讀如隣，非是則不敬。他字亦分兩意，呼平輩可直曰他，卽彼意也。然述及尊長，則他字必讀如坦，匪是亦不敬。

有一字而分三意者。如得字，失手而物碎曰「得」，其音促，有惋惜意；見

人相爭而曰「得了」，有勸止意；令人作食物或製他物曰「得了嗎」，有詢問意。

亦有以平聲字作仄讀者，如兒女姻親謂之親家，此本古語，見唐書蕭嵩傳，京音親讀去聲如慶。按此亦有本，唐盧綸王駙馬花燭詩：「人主人臣是親家」，則由來久矣。京中土俗，晚輩呼姻家翁媼曰親家爹、親家媽。官稱則否。

稱我曰咱，我所獨也。曰咱們，則與言者所共也。昔有人初至北京，學爲京語，偶與友談及其妻，輒曰：「咱們內人。」友笑謝曰：「不敢。」俄又談及其親，復曰：「咱們的父親。」友亟避去。

京人談話好爲官稱，有謙不中禮者。昔見一市井與人談及其子，輒曰：「我們少爺。」初以爲怪，後熟聞之，無不皆然，以是謂之官稱。又見旗下友與人談，詢及其兄，則曰：「您的家兄。」初以爲怪，後讀庸盒筆記，乃知其有本，不足怪矣。

京師人海，各方人士雜處，其間言龐語雜，然亦各有界限。旗下話、土話、

官話，久習者一聞而辨之。亦間攙入滿蒙語，如看曰把，靠役曰蘇拉，官曰章京（讀如音），主管曰倂蘭，大皆沿用滿語，習久乃常用之。又有所謂回宗語、切口語者，市井及倡優往往用之，以避他人聞覺。庚子後，則往往攙入一二歐語、日語，資爲諧笑而已，士夫弗屑顧也。

京語有最雅者，如曰可一街、可一院，卽滿街、滿院之義也。唐人詩：「一方明月可中庭」、「山可一窗青」，皆與此義同。謂怯曰楚（讀去聲如醋），天祿識餘謂應作𪔐，齒怯也。引曾茶山和魯宏父雙柑詩云：「莫向君家樊素口，瓠犀微𪔐遠山顰」爲證。

有讀音最準者，如以脂膏車之膏，飲馬之飲，均必讀作去聲是也。

有最合古義者，如謂短矮人曰筵。按通鑑音義：筵，七乖切。唐書王伾傳：『形容筵鄙。』至於呼車輪曰較物，被污曰染，節用曰摠（讀如存），吝曰剋嗇，適曰舒坦，含羞曰靦覷，巧曰機伶，增添曰續（叶序），失意曰蹙槽，忍受曰蹙，驚曰發慌，無聲曰悄默，潛藏曰隱欺，匿曰昧，物重曰沉，輕浮曰飄，夢

語曰發譏，半眠曰迷糊（卽模糊），微熱曰烏突（溫噉轉音），南音曰蠻，老曰龍東，舒物曰伸，稱量物曰較。皆與古義相合，前人詩文中亦恆見之。

有雖爲俗語而有意義可尋者。如大言曰吹，視曰瞋，偷覷曰瞷，佯示以物曰晃，性急曰毛躁、曰發毛，私曰體（去聲）恤，私財曰體己，錯誤曰擰（上聲），執拘曰撇扭，亦曰擰，中空曰草包，閑談曰撩，閑游曰逛，飲曰喝，吸烟曰抽，亂曰麻煩，熱鬧曰火熾，亦曰火爆，不熱鬧曰溫，欺騙曰籠統，美曰俊，亦曰俏式，又曰邊式、曰得樣，性傲曰苗，柔曰溫存，發怒曰火勁，剛曰標，纏足曰蠻子，天足曰旗下，乞物曰尋（讀如形）物，光緻曰抹麗，予人曰給，不老曰少形，說明曰告（讀如稿），借宿曰尋宿（讀如形休），大聲曰嚷，羣作曰闐，驅逐曰轟，接近曰拉攏，勞曰累，亦曰乏，不強曰乏，物過熟曰大乏，脫空曰漂（去聲），美曰漂亮，刻薄曰損譏人，亦曰損，初起曰底根，終了曰壓根。或以形象，或以意會，皆不失字之正義者也。

有並無意義，或並無其字者。如醉曰喇嘛，從旁揶語曰得吓，向人私語曰啾

咕。則僅爲一種流俗方言，無可深考矣。

京師工藝，有曰減金減銀者，以金銀絲嵌入銅鐵器者是也。字當作鏤，讀如減。漢馬融廣成頌：「金鏤玉鑲」，其字甚古。

京語有極刻薄者，如呼考生曰浩然子，初聽其名甚美，然其諧聲實爲號瓢子也。蓋喻號舍如瓜，而考生居其中如瓢。呼落第舉子曰豆芽菜，蓋喻凡物皆種而後出（種叶中），惟豆芽菜則不種者也。呼浙紹人曰臭豆腐，譏所嗜也。久則並南人皆呼曰豆腐皮。

京人聞人道失意事，輒失聲而呼曰「唉！」有嘆惜之意。史記范增傳：「唉！豎子不足與謀！」

謂物之圓頭者曰骨朶，其字應作胍朶。宋景文筆記云：「關中人以腹大爲胍朶。胍音孤，朶音都。」俗因謂杖頭大者爲胍朶，後譌爲骨朶。宋時御殿儀仗列之。今京師猶有此稱。

謂路之岐者曰趺路，亦可作差，俗譌作岔。按韻會小補引唐詩：「枯木巖前

差路多」，謂歧道也。差，丑亞切、歧也。集韻或作𨔵，董遷周景集亦引之。

稱己所居室曰我屋裏。按陶淵明詩：『我屋南窗下，今生幾叢菊。』又王安石詩：『我屋公墩在眼中。』

卷二 朝流

清德宗初年，東南軍務稍定，京朝士大夫漸有承平景象，於是清流之名起。當時大老主持壇坫者爲潘伯寅、翁叔平、張子青、黃漱蘭諸公。李越縵、李芄農、寶竹坡、張香濤、王蓮生、盛伯羲、忘伯愚，更爲羽翼。迨常熟當國，延致名流，文道羲、張季直皆爲得意弟子。甲午之役，文頗銳志功名，力以主戰之說干常熟，而於敵我之情勢，固未暇考也。海軍之經費，已移作頤和園修理之費，亦未知也。馬江一敗，中國之內容既露，始爲各國所輕視矣。

潘吳縣生平精力，大半銷磨於金石。嘗見王蓮生家藏名人手札，王得一銅器，潘借觀不還，師弟斷斷相口角，亦名流之佳話也。

伯愚爲長樂初將軍善子傳文忠恆之孫也，其妹入宮爲珍妃。將軍鎮廣州時，頗提倡風雅。時文道義之父任廣州府，道義與伯愚弟兄文字相結契，文之大考擢學士，伯愚與有力焉。或傳道義常課珍妃讀，語蓋不確。志氏昆季皆有才調，喜與名士交，又世居戚里，於時文士之講聲氣者，皆締交焉。迨珍妃入永巷，伯愚外貶，名流冷落，時人爲之詩曰：「今日清流盡可哀，伯愚烏里雅蘇臺」云云，一時名士雲散風流，亦朝士一變局也。

清流最負盛名而喜談兵略者，南爲吳清卿，北則張幼樵也。幼樵論兵事如掌上螺紋。清卿自謂精槍法，有百發百中之技，試之良信。與習者，或謂其槍上置望遠鏡云。兩公皆主用兵以張國威，清卿北辱於榆關，幼樵南敗於閩嶠，論者或謂用違其地矣。

自吳、張好談兵而致僨覆，於是清流乃出其看家之學，以相號召而消磨日月。其目約分爲五：曰三傳三禮，曰金石碑版，曰考據目錄，曰小學輿地，曰詞章楷法。厥後道義諸人出，始復有志於兵事。

當時名流文酒之會，率爲詩鐘，伯愚與弟仲魯皆爲能手。於時珍妃方得寵眷，余嘗見仲魯一聯，題爲分詠李延年瓦松，云：『可憐兄妹承新寵，未必風霜耐歲寒。』賞其渾成大雅，而竊訝其不祥。未幾而妃貶，伯愚昆仲各竄逐矣。

清流中以李越縵爲最淹雅，亦最兀傲，其自署所居門聯曰：『保安寺街藏書十萬卷，工部員外補缺一千年。』門內修竹數十竿，掩映窗戶間，不恆病而好服藥。過其居者，但聞諷詠與呻吟聲相間作，時人戲比之林黛玉云。潘文勤伯瀛最禮敬之，亦恆煩其捉刀，至年節常饋贈焉，憫其貧亦懼其罵也。都中俗稱馬料曰喂養，潘值年節，輒囑其僕曰：『速送李老爺喂養去，否則跳躑矣。』雖惡謔，亦見當時大老憐才之意。

清光緒初，滿部員之最負時望者，爲榮祿、端方、那桐，皆於部中最有權，當時所謂紅人也。時有聯云：『六部三司官大志小那端老四，九城五密姐雙紅二翠萬人迷。』皆喻其紅也。

在昔京朝官最清苦，五品實缺官，歲俸不足百金，兩季米十石餘耳。正途候

補者，減半支給。捐納並半俸無之。生活之需，多仰給於外官之冰炭敬與別敬，而大宗收入，爲印結費。凡捐納人員，須由同鄉京官爲之出結，省立一印結局，輸結費，始得赴引。質言之，則國家開捐例，而京官分其餘潤爲生活而已。此亦失政體之一端。自光緒壬寅設外務部，始定公費，而商部、郵部踵之。迨宣統初，則捐例停，印結之費絕，各部始一體給公費，京官始有正當之生計。然余觀二十年來生活程度之增高，何啻十倍昔日。賃屋無過四金者，宴客一席亦無過四五金，車馬喂養無過十金，僕媼工資祇數百文，碾倉米爲炊，數口可飽。所入雖微，猶有餘力以爲娛樂遊戲，文酒之宴不廢。每一思之，感深今昔矣。

舊之六部戶曹，筭財政最爲膏腴之地。吏部掌銓衡外省官員，謁選入覲者，奉爲神明。刑部操生殺之權。兵部典戎政。禮部事簡，最爲清貧。工部多雜流，所與接近者，木廠商人而已，頗爲士流所輕。故時人之喻六部者，曰：富、貴、威、武、貧、賤。

慶王奕劻，初爲支庶，能讀書，授蒙童於西山間。入繼爲貝勒，當時所稱劻

貝勒也。起自田間，恭謹能文，遂爲宗親中之矯矯者。歷官當國，累晉至親王，食親王雙俸，世襲罔替。清諸王，非皇子卽八家世襲王，其以貝勒晉封世襲者，惟慶而已。其後臺灣之割，旅順、大連之租借，皆慶當國領銜，譏彈者至呼爲慶以地云。清制不設相，殿閣大學士特爲崇銜。其操中書省樞密院之實權者，實惟軍機大臣。其領銜者，必爲親王，故名之曰王大臣。醇薨恭去，孝欽爲自握威權計，特以軍機領袖，付諸遠宗之禮王世鐸，此在慶之前一人也。其人庸庸無他長，簠簋亦不修飭，特以小心奉西朝，又復下和同寅無大過，故能保持數年，慶起遂取而代之。

軍機名次最末者曰「挑簾軍機」，蓋咫尺森嚴，軍機入對，宮監亦須迴避。其入也，居末者挑簾，俟在前者畢入，乃亦入焉。孫萊山之入軍機，以代表醇王，名雖挑簾，而多發言，實操大政。瞿善化則以王仁和年老重聽，孝欽亦知之，故有所指示，輒語瞿，眷注遂優。或謂其貌類文宗者，皆爲臆說。

王仁和與張南皮同在樞府，夙有意見。仁和之薨也，孝欽以其陳力久，悼惜

之，諭飾終之典必備。章京擬旨，其首云：『大學士某持躬廉慎，學問優長。』此蓋例稿，時慶邸、南皮、項城均在坐，南皮閱稿，指第一句之廉字，搖首曰：『廉乎？奈曾呈名雲南報銷案何？』至第二語又曰：『彼非翰林，奈何用此語？此必須改。』迨復擬，則易廉慎爲精敏，張拍案曰：『精字妙，誠哉精也！』章京復前謂第二句不可易，因大學士例得諡文也。張沈吟久之，曰：『此無奈何。』稿乃定。

清季所稱三宮保者，袁、岑、盛也。三公智均力敵，各擅勝場，於西朝之眷遇，及所據之勢力，亦互相消長。然於清社之存亡有繫焉。自鐵路國有之政策出，而民心始變，迨洎上復起，遂成結局矣。

盛扼於袁，澤公起欲推慶、袁，乃復起盛。然慶未去位，盛無從起，到京後，徘徊久之。於是以鐵路國有爲自進之妙策，然不欲自爲發端。欲覓言官陳之，而又懼爲人所挾持。時有石侍御者，老儒也。服官數十年，寓某客棧中，讀書自娛，於時事嘗如也。武進物色得之，枉駕先施，謂欽其品學，石亦甚喜。繼

復杯酒相招，歡談既浹，乃言：『吾有富國揀時良策，惜言路無人能陳之。』出示以稿，石大欽服，慨願陳奏，其摺遂上，而軒然大波起矣。

清之末季，有所稱四公子者，陳伯壘、丁叔雅、譚復生、吳彥復也。丁最修潔雅飭，以邵曹滯京，居潮州會館，門無雜賓，亦不輕談時事，詩詞相唱和而已。余嘗雪夜過訪，丁自起掃雪烹茶，清談達旦。余笑比之石頭記中之妙玉，不爲忤也，後以貧卒。陳最工詩，刊落浮詞，自成宋人家法，作秦淮寓公甚久，改革後，老矣，猶主江南壇坫。譚學最新，才氣縱橫，議論新穎，卒遇戊戌之難。彥復清才不羈，余與同官刑部浙江司，終歲不一到部，長官亦優容之。晚娶女伶彭嬌。項城早受吳勤惠知，任北洋時，吳往依焉。所以資助之者良厚，顧隨手揮霍輒盡。一日謁項城，謂生計蹙，將作一商業以資餬口。項城問將何作，曰：『將與彭嬌同設一妓寮，庶收入稍豐耳。』項城大笑曰：『吾知汝意，汝又窮極矣。』立畀五千金，令持去。後以消渴疾，客死於津，而彭嬌竟不能守。

戊戌六君子中，林東谷年最少，才具亦最明敏，其死東市也，神色不變，惟

仰天冷笑而已。劉裴村光第，沈靜好學，在刑部同官時，不輕聞其發言，而皮裏陽秋，偶詢一人一事，輒能言之娓娓，才最可惜。

庚子三忠：袁太常、許尙書、立尙書也。袁以直諫，許以擅外交，與洋人接近，其遇禍宜矣。立以戶尙兼內府大臣，久爲孝欽所親信，乃亦同時付東市，人皆疑之。按立初爲內府司員，甚貧困，性儻蕩，好與漢官文人游，與先伯司寇交最深，日來過飯，聞舊僕云：『家中每日飯時，必候楊四爺也。』庚子三月，余請假歸省，以故舊往告別，時淞水團起事，立以詢余，余曰：『此亂民耳。假託神話，必召大變。』且舉宋郭京事告之。立拍膝曰：『奈近侍輩日以邪說惑上聰何？』余曰：『公爲近臣，奈何不持正論？』立深然之。事起，立言於孝欽，莊王等忌之，且利其家財，逮之。事定後，余查部卷，其獄詞曰：『家近西什庫，有地道暗通教堂，且令三次赴壇焚香，表皆不起，實爲暗通洋教。』云云。所謂地道云云，蓋爲搜括家產地也。然立特近倖，瞽御耳，平日簠簋亦不甚飭，乃得與袁許並名，未爲非幸矣。

清初有會同四譯館之設，凡高麗、琉球、越南、緬甸諸屬國貢使之入皆隸焉。其職蓋如主客，卽東西各國使人之至，亦由館人傳達。迨海禁棧通，重譯事煩，同治間，始有總理衙門之設。以親王領之，尙侍中之通達者爲大臣，而考取正途部曹中書爲章京，如軍機例。光緒庚子後，以外人要求，改爲外務部，專管外交。親王領之，會辦大臣一，擇軍機大臣一人兼任之。尙書一，侍郎二，始破滿漢對用之例。丞二，秩三品；參議二，秩四品；四司一廳，郎員主缺，凡三十四。

戊戌新政，有農、工、商局之設，三局各設總辦，端午橋、徐雪岑、吳調卿分任之。奏調人員十有八，皆知名士。特准與各部輪流值日，預備召見。徐之赴京在政變後，甚徬徨。某軍機爲之先容，謂徐某特以久辦兵工廠被薦，非康黨，孝欽乃召見焉。迨庚子後，貝子載振出洋，過南洋，有僑商書記川人吳桐林者，條陳設商部，載振納其說，攜吳歸。商部既立，振爲尙書，兩侍郎爲伍廷芳、陳璧，而右丞唐文治實主部事。規制一仿外部，曹郎缺二十四，奏調與考試兼用。吳

既孤寒，亦實無才具，畀之閒散而已。厥後裁工部，以其事並隸之，改農工商部。郵傳部之設，張百熙爲尙書，胡燏棻、唐紹儀爲左右侍郎。胡未到任而逝，吳重熙承之。百熙死，林紹年代。不一月岑春煊代。岑出督粵，而陳璧繼任焉。陳在官無美評，然京漢路之贖回，京張路之興築，皆其手辦也。贖路事在當時頗有滋疑議，然事後考查，曾無何種弊竇，且收回路權，持以毅力，有足多者。後爲言官所劾而去，而任以李殿林，蓋醇王之西席也。

刑曹於六部中最爲清苦，然例案山積，動關人命，朝廷亦重視之。故六堂官中，例必有一熟手主稿，餘各堂但畫黑稿耳。薛尙書允升既卒，蘇撫趙舒翹內用繼之。趙誅，直臬沈家本內調爲侍郎，皆秋審舊人。凡稿須經沈畫方定。余在刑曹時，見滿左右堂既不常到，到則各司捧稿，送畫輒須立二小時，故視爲畏途，而愈不敢至。其庸沓可笑，然尙虛心，蓋每畫必視主稿一堂畫畢否，既畫則放筆書行。若問見有未畫者，則曰：「先送某堂，看後再送」云。

前清雖帝制，然用人行政尙取廷議、循舊章，清議所不容，成憲所不許者，

未敢漫然行之也。在秋曹時，有一捐納郎中李福海者，太監蓮英之姪也，到司鮮與交談者。一日，葛尙書寶華入見，孝欽徐謂：『李某可酌予一缺。』尙書曰：『臣部額缺有定，捐納人員須俟到班方能補實，不敢破成法。無已，或畀一小烏布則可耳（烏布滿語差使）。』孝欽默然無以難也。余之調郵傳也，某尙書采虛聲而用之，旣而意不洽，則於所擬稿牘，尋斑索疵。余旣知之，寅友亦多勸引避者，余則宣言曰：『某之官自考試來，其調部亦由長官自動，非由請託，今惟按時到散，循例辦公，靜以聽之可也。』然某公亦竟無如何。以視後來員司，以長官之喜怒爲進退者，則又遠矣。

舊例，部曹惟進士、拔貢爲正途，餘則保舉、捐納。雖舉人出身，而一經捐納，卽爲異途，亦不給俸。故李蘊客有補缺一千年之慨（李初以捐納部曹分工部後始中進士）。記庚子迴鑾後，發恩俸一次，異途京官，亦得與焉。同鄉甘兵部璧以黃布裹之，供於祖堂曰：『當差四十年，今始得霑微祿耳！』可嘆如此。然一經中會，請歸本班者，曰資深先，遇缺卽可補，以同榜無其前資也。自後新部

成立，奏調紛繁，舊例始破，仕途亦始雜。

當時朝流中，能講工藝實業者，首推黃學士思永。拳亂時，被收入獄，在獄中，日書大字數百，心志頗堅定。事定出復故官，乃設工藝局於琉璃廠，提倡珐瑯、雕漆、栽毯諸業，得超等文憑於法國賽會，出口歲增數百萬，惜財力薄，無大資本家助之，所招股本特鄉年世好錢錢廉俸而已。故終至停辦，歸任浦口商埠督辦，值革命，沒於海上。余爲清結其工藝局未完事，惜其造端宏、志願大，而屈於所遇也。

清之末造，兩世無儲，旁宗入繼，而孝欽與醇王之福晉，兄弟也。援立不能無私，宗親乃始爭競。宣統繼位，攝政庸懦，力不能制其家人。於是宗族並進，各爭權力。當時九部，財政則載澤，外交則奕劻，農工則溥倫，海軍則載洵，理藩則溥良，宗人實佔其五。此爲清一代朝官之變局，而社亦遂屋矣。

排漢之說，至剛毅始明目張膽言之，嘗謂某翰林曰：『內人日內免身，倘生男也，墮地卽與君同一資格。』蓋滿人捐數十金，卽可得筆帖式，其升途一切與

編檢七品小京官同也。此本漢滿顯分之階級，惟剛傲狠，不恤人言，乃引以辱漢人耳。剛識字無多，臬陶之陶讀如桃，剛復之復讀如復，或正告之，弗信也。

徐蔭軒相國以講理學名。雖稱頑固，故無大過。若其子承煜者，則真梟獍矣。拳事方起，承煜爲刑侍，在公堂與趙舒翹切切私語竟日，司官持稿上堂，輒不得畢畫。蓋其時趙方入軍機用事，有察看拳民之命，承煜力主之，故復命涉含胡。迨兩宮倉皇出，蔭軒年過八十，且已在告，承煜則力勸父殉國，以邀身後名。持繩逼之，其父遂自縊。說者謂渠自知罪魁，冀父殉國，可得邀寬典也。卒正典刑，當時快之。

舊京瑣記

卷四 宮闈

清代宮闈整肅，蓋由立法嚴也。宮內稱后曰主子，妃嬪曰主位。至稱佛爺，則始於孝欽侍監諛美之詞耳。妃嬪行動曰關防，關防之嚴殊甚。各有太監以轄之，與外間音問斷絕。惟后妃家進送食物，例所不禁。故珍妃入宮，稍與外事書柬，皆自食盒中進。其被杖而貶也，孝欽蓋搜得其母家之書札云。

清初立法，首防外戚之患。女爲后，則父封一等承恩公，沒贈太師，無許執政者。弟兄率授散秩大臣，通籍奉朝請，充宿衛而已。孝欽當國，其弟桂公祥，又爲德宗之外舅，常以閒秩無聊，求補一官，破例授工尙，不三月，卒令解秩，以其不稱職，恐滋物議也。至於穆宗后父崇綺與其子葆初皆精文學書法，在滿宮

中爲最傑出者，然皆不得與政。庚子之變，闔門掘地爲深坑，皆殉國難，爲尤不可及云。

宮女定制不得逾五百人，皆選自內務府下三旗人（內務府人曰包衣下三旗），本皇室之僕御也。間歲一選，出其逾歲者，纔令足額而已。選取之制，率於二三月間，凡包衣旗人家生女皆入冊籍，及歲者皆得與選，曰選繡女。富家多不願女入宮，或賄不入選，或以醜陋者應名，冀落選，亦事所恆有。宮女妝皆紅襖綠棍，常服惟藍布衫，粗劣已極，以視歷史所傳，奚啻霄壤，其不擾及民間，尤盛德事也。

宮監之制綦嚴，順治十二年，立鐵牌於十三衙門，其文曰：『中宮之設，雖自古不廢，然任使失宜，遂貽禍亂。近如明朝王振、汪直、曹吉祥、劉瑾、魏忠賢等，專擅威權，干預朝政，開廠緝事，枉殺無辜，出鎮典兵，流毒邊境，甚至謀爲不軌，陷害忠良，煽引黨類，稱功頌德，以致國事日非，覆敗相尋，足爲鑒戒。朕今裁定內官衙門及員數職掌，法制甚明，以後倘有犯法干政，竊權納賄，

囑託內外衙門，交結滿漢官員，越分擅奏外事，上言官吏能否者，即行凌遲處死，定不姑貸。特立鐵券，子孫永守。』云云，終清之世，無奄寺之禍者，蓋由此也。至末季之安得海，雖近張狂，然被戮於山東，而宮中不能問。李蓮英則僅於宮闈間施其狡猾，外貌則猶恭謹云。

內十三衙門者，順治十年六月立。首爲乾清宮執事，次司禮監、內官監、司設監、尚膳監、尚衣監、尚寶監、御馬司、惜薪監、鐘鼓司、直殿司、兵仗司，皆近臣與宦官兼用。後又增設尚方司，又改鐘鼓司爲禮義監，尚寶監爲尚寶司。及康熙卽位，乃並十三衙門裁之，設內務府以領其事。而於宮內設敬事房以管太監，其官職則有總管、首領等。有職太監，月給銀三兩而已。

宮監多無賴，然佞佛，又好行小惠。親串蔣氏爲內府果商，其進果各宮監皆有分例錢。清末蔣以內府領款不易，遂中落，然承值如故，內監例錢往往賒貰。余曾過蔣，適門者報某監至，則男子倉皇避去，而婦女出應之。某監入門拍案作虎勢，謂今日若不與錢，必以性命相搏。婦女屏息聽其作威，俄稍息，奉以菸

茗。繼而婦女之哭聲作矣，且哭且訴，謂領款如何艱難，外欠如何急迫，又欠例錢，尋思無路，但有死耳。某監者始而靜聽，繼而拭淚，繼而婉勸，終乃曰：『此真不了矣！吾輩多年交誼，寧忍坐視？』乃懷中出數金云：『區區相助，度此數日，勿過傷也。』婦女收涕道謝，監則殷勤勸慰而別。余竊觀之，失聲欲笑。蔣氏曰：『此成文也，如此攢塞，已近十年，卽有資不能予，予一而百至，欲無厭也，但有苦肉計耳。』噫！其真婦寺之仁歟？

清制內宮不得過四品頂戴，毅宗朝某監最貴，已四品矣，猶乞恩晉秩，毅宗戲謂之曰：『汝嫌藍色頂不佳，當爲汝晉一秩。』則出最佳之翡翠，命工製一頂戴而賜之，某監大窘求免，則並其四品頂襯之。此雖近於遊戲，然亦裁抑內監之妙法也。

宦官在宮內，權力亦偉。聞孝欽萬壽，某省貢珊瑚一雙，高及三尺，役夫損入，失手而碎其一，押貢官失色。有導之商諸某總管者，總管笑曰：『以萬金至，吾爲辦之。』如其言，乃留之小坐進食，炊許，復曰：『吾與汝試往觀之。』則

已成對，無毫髮異。蓋取庫中舊存者配之，俟進御後再撤換耳。又光緒大婚，時戚人蔣某承辦御果，須全紅蘋果九大盤。臨進御，則各盤皆失其頂之一，小監視之而笑。蓋以索賄不滿，窘之也。蔣則從容自懷中出果九枚，一一安之。顧小監曰：『老弟失敗矣，予已夙備之。』

孝欽宮中有一女清客，卽繆素筠，俗呼之繆太太。繆滇人，早寡，工繪花鳥。孝欽聞之，令供奉內廷，時令代筆，月賜十金而已。以纏足故，日隨乘輿，甚以爲苦，三五日得一休沐。鄰人李某與繆戚串，余得一晤焉。時已五十許，談論有林下風，人極謹慎，供御書畫外，不干涉一事。其兄某爲工部員外，誠朴守分，不因女弟乞恩澤。晚年始截取一知府，候補直隸，疆臣雖禮重之，時予以優差，然終未緇銅符也。

孝欽晚年，有二女友，一爲樞臣榮祿之妻，一爲禮尙懷塔布之母。得通籍入禁中，侍談宴，宮中呼之爲福祿壽三星。福指孝欽，祿指榮妻，壽指懷母，其時已八旬，猶極健也。

宮中有女繙譯二，裕庚之女龍菱、德菱者是也。母爲法人，二女故明慧能英法語，裕使法歸，二女已長矣。時宮中恆有外使眷屬入覲，以通譯官皆男子，甚不便，或繩二女才，又係內府人，召入供奉，備通譯，頗優寵之。命侍監呼之曰姑娘，以殊異於其他宮女而已。近見德菱所撰「清宮二年記」，語多非實，宮禁事秘，固非外間所知，然云召見臣工，渠輩於屏後竊聞言論，則爲不經。宮內召見處，雖太監及門，亦引身退室中，但有兩宮，旁無侍者，豈有屏後偷窺之理？至敍與德宗相見，語涉私狎，尤爲誣妄。聞之老監云，帝起居至不自由，宮女不得輕接一語。宮人見駕過，跪俟而已。安得輕接言笑？某友謂德菱思嫁一美國富商，美人最欣羨他國之貴族有爵者，德菱特著此書動其仰慕，故自稱其父爲公爵，而以上云云，特以自抬聲價而已。近聞已婚美人，某語或近信。

如意館者，宮廷以養畫師，名曰供奉。月各食五六品俸，視其技爲高下。蘇人管某技最工，爲之領班，賞四品服焉。孝欽故工畫，然尋常頒賞之品，率由供奉爲之，稍特異者，則繆素筠爲之代筆，自作殊罕見。曾於立尙書家，見其一幀

羣仙祝壽圖，蓋真跡云。

宮內新歲，春聯色皆用白，由南書房翰林以宣紙書之。自殿廷至庖廐，其文皆有常例，不敢稍易。外間王公府第，亦用白，蓋祖制也。每歲暮，向由工部司員帶匠人入宮黏貼。此差初改歸農工商部，余亦被派往，門監索例規四十金，同人皆未夙備，相顧甚窘，與婉商，照例補送，始得竣事。

惠公平回部，俘香妃歸，進之宮中，近人筆記記載紛歧，要其事爲實有也。南海寶月樓（今之新華門），俗稱回妃望家樓。其街南舊有對峙一小樓，樓下地名回子營，爲回部歸誠仕族所居，今尙有一二家存者。故老相傳，香妃入宮，其家族亦隨而入都，香妃思家，而限於禮制，上特於南海爲建寶月樓，而於其對面之回子營，亦建一小樓。香妃登樓眺望，其家亦得登對樓以瞻顏色。否則皇居尊嚴，豈有面宮築樓之理？至香妃固以疾薨，園寢尙在。復仇之事，皆出臆說云。回子營之小樓，余尙見之。今則平夷，故址不可復覓矣。

武英殿左有小殿，榜曰「浴德」。內有浴室，用土耳其式建造，甚精美。近

人傳謂香妃浴室，此齊東語也。清廷嬪御，無出乾清宮者，武英已爲外廷，回妃卽有浴所，當於寢宮內爲之，豈得作於閣臣侍講之地？內廷老監所云此爲祀社稷壇之齋宮，聖祖喜西學，侍從之班頗有西儒，偶悅土製之精，效其建築而已。其說近是，附會之談可哂。

孝欽之待德宗，外傳其如何寡恩，實不盡然。庚子以前，戊戌以後，政變既作，則母子間之疑忌誠不能免。至西巡以後，間關患難，迨於回鑾，復歡洽矣。特政權不肯輕放，則猶未忘前事。憶某內臣告余一事，足爲參證。德宗初與隆裕不和，孝欽憂之。某歲新正，聚博爲戲，德宗屢負不樂。孝欽既搖一寶盒，起而更衣，陰命宮人示意隆裕，令微揭以示，德宗乃大勝。帝后因之遂和，其委曲求全如此。特清廷家法，素多儀文，德宗守禮，雖在病中，恆扶疾強行之，殊以爲苦耳。

清廷帝后出行，警蹕殊簡。居園時，官員赴園奏事者，途遇駕過，但令迴車下簾，安坐車中，俟畢始行。村農叱犢田畝，亦仍其常。

兩宮往返宮園，謂之挪動。車後必有百數十抬，以黃袱覆之，見者疑爲資重財貨，實則御用器皿而已。立尙書嘗笑謂余曰：『外間揣測全誤，內藏之財，自有司之者，豈若貧兒暴得數金，便一刻不可去身邪？』

清之失國，由於漢滿之見太深，此無可諱言者。胡文忠之在鄂，至與官文結骨肉之誼，而後能成其功。金陵之克，曾文正必推官文領銜具奏，李合肥傳其衣鉢，而謹畏尤甚。至以海軍經費充頤和園經費，遂致甲午之敗，一蹶而不可復振矣。因果之來，所謂自耕自穫歟！

孝欽先世，蓋嘗有因罪繫刑部獄者，其幼時曾往南所（卽刑獄）探視，故地方甚熟。友某以提牢任滿，召見詢監所狀況甚悉，且知其情弊。友露驚訝色，孝欽徐曰：『此余所舊游地也。』

或傳孝欽名翠，故文宗於中海建攬翠亭。昔溥玉岑尙書督學江蘇時，諷學官令士子避翠字。又記有同試某君，文極佳而被放，以文中用「握瑾懷瑜」字也。瑾瑜皆妃號。瑜太妃工繪事，至今猶在。所攜險飾，變斥略盡，生計甚窘。聞上

年至售其洗頭盆以度歲，可慨也。

德宗議婚時，贛撫德馨女甚端美，已由內務大臣奎俊拴婚矣（帝室納婚有拴婚大臣，如民間之媒人者然），德宗亦甚屬意。孝欽終私於母家，強委禽冊隆裕焉。故帝后不和，然隆裕亦不能得姑歡。奎俊以無以對德女，爲其子銅林聘焉。銅與余同官郵司，弱小有名士習，終歲不浣面，其夫人無如何也。

德宗之後，序親及賢，羣議宜立溥倫。然孝欽懼立長嗣，將更歸政也，舍而立溥儀爲大阿哥。自西安歸既放廢矣，乃益趨下流，與厮養輿卒爲伍，其行徑益不堪矣。

德宗之幽居瀛臺，因肝疾而怫鬱愈甚，小監偶不適意，輒罰令長跪，日書項城名以誌其憤。隆裕視疾，蓋常見之。及大漸，聞書片紙，私與隆裕曰：『殺余者某人。』故隆裕親政，首逐項城云。

清宮舊例，春仲，皇帝親耕於先農壇，示重農意。而后妃亦於三月出桑，於桑園先日備黃亭一，紅亭二，中置提筐與鉤，備后妃用，鼓樂送之，余蓋親見

者。其祀蠶之禮，則外人不得與觀也。

宮中用燈，當時玻璃未通行，則皆以羊角爲之，防火患也。陞道上所立風燈，高可隱人，上下尖而中橢圓，其形如棗。俗呼棗曰參參棗，其音如嘎，故此類燈亦曰參參燈云。

舊京瑣記

卷五 儀制

宮中三殿：太和、中和、保和，皆沿明舊制。太和爲正殿，近世唯光緒親政、大婚及宣統登極御焉。丹墀下列品級石，百官分品序立殿階，尊嚴莫敢仰視。中和殿則惟大祀看版、耕藉田、陳農器、御駕一蒞。余於光緒中與耕藉田禮，往將事焉。保和殿則殿試、覆試、朝考、大考、考差皆於此，筵宴外藩亦在焉。

御正殿曰坐朝。其五日一常朝曰坐門。御門之典舊在太和門，後改御乾清門。至咸豐而中輟，迄同光朝皆未舉行御門。儀物有二木箱，置乾清門左右，以至於亡，終未開也。

清之末代，不坐朝而但引見、召見。辦事各衙門奏摺以夜子時，由司員一人

捧至東華門外，少俟，門啓，隨奏事官以入，至九卿朝房，摺匣交奏事官錄於簿。乾清門啓，奏事官奉之入內奏事處，交奏事太監呈覽，時僅丑正。唯奏事官一燈置石欄上，視燈移至堦上，則事將下。俄而奏事官捧摺出，呼接事，則羣鵠立以俟。奏事官呼某衙門依議，曰「知道了」；曰：「另有旨」，口傳手授，百無一舛。蓋視摺上指痕爲辨，橫畫曰「知」，豎畫曰「議」。至光緒時，則移至西苑門，領事者咸俟於外侍衛處檐下。

天安門上舊有金鳳一，凡恩詔皆從鳳嘴繫而下，殆所謂丹鳳銜書也。臣工之接恩詔者，皆跪於金水橋下，曰聽宣。宣詔官用滿州語於門上宣讀，其音宛如牛鳴甕中。

壽皇殿者，以供列祖御容，每御容前必供平果一大盤，四時弗撤也。月之朔望必祭，四時令節必祭，各祖忌辰必祭，故皇帝每晨赴壽皇殿之時爲多，赴殿後，始詣慈宮問安也。

引見之制，外官及初發人員，由吏部帶領，京官由各部自行帶領，先具綠頭

簽，曰膳牌，分繕銜名，由奏事處進呈。吏部排班，班六員或八員，由部員二人領之，一曰帶班，一曰押班。光緒時，值引見，則皇帝前坐，太后後方高坐如供佛然。引見人員奏報其簡，但稱某名某省人，若干歲而已。

外官監司以上及京員京察俸滿者，引見後必有召見，俗謂之叫起。召見之制，在偏殿或暖閣中，宮監及簾而退，入屋而跪，先去帽，曾賞花翎者，必以翎向上，以示敬。

南書房之制，始自康熙朝之桐城張文端英。其時欲得文學之臣，講頌經史，並備諮詢，俾帝於退朝後，朝夕居左右。選於衆，得文端，賜舍瀛臺之西，大官給飲饌焉。蓋於談經論道之餘，兼亦商及時政得失，優禮儒臣，典至隆重。厥後歷代皆於詞臣中選之，人數漸多，恩禮亦減，專供上方代筆，或書寫春聯、題詠書畫，文學侍從而已。

上書房舊設於阿哥所，卽皇帝之師傅也。亦於詞臣中選拔充之。其恩賚體制亦如南書房，凡喫肉、聽戲諸典，皆得與焉。

帝師之尊無二，向於大學士中擇一人任之，如李高陽、孫壽州、翁常熟皆是也。自帝以下，均尊之曰師傅，而不敢名。其歿也，例得諡文正。此外復於詞林中選二人或四人以侍講讀。帝讀書何殿，則稱之曰某殿行走。宣統時，兼及西文，聘西人莊克敦爲教授，其體制與某殿行走同，特俸給較多耳。

歲仲春，帝祀先農壇，行耕耤田禮，三王代三公，一品九人代九卿，帝四推，公卿九推。帝本三推，咸豐時四推，示重農意。作詩懸於更衣殿，後以爲制。帝親推畢，御觀耕臺，觀公卿推。服端罩，黃緞爲之，如外褂，而稍變其制。

有祀典，先期齋戒，或二日，或一日，視典之大小爲差。宮中設牌於宮門外，外省官廳各於儀門外供之。內廷自帝后下及妃御、宮監、內廷行走官員，各以小牙牌一，上刻齋戒字，掛於胸前，曰齋戒牌。

春秋，日月食，書災異，以時無共主，諸侯放恣，孔子假神道以設教也。歷世相沿不改，以爲常儀。禮部通行各省派員救護。實則科學既明，欽天監已推算時刻，分秒無誤，尙何災異之足云？然奉行者莫敢廢也。各署所派皆資淺閑散之

員，屆時詣太常寺，列跪於庭。庭中具鉦鼓僧道，設壇唵經，金鼓梵貝之聲，雜然並作。復有糾儀御史，監察其間，見有欹倚談笑者，謂之不敬。此制至光緒末年始罷之。

衣服之制，四時更易，皆由宮中傳出，登之邸抄而行。各部署引見時，冬裘不得用羊皮，惡其近喪服也。夏不用亮紗，嫌其透體也。遇萬壽或年節皆蟒袍，謂之花衣期。逢齋戒、忌日，皆青外褂，謂之常服。國喪則入臨皆反穿羊皮褂，餘日元青褂，至奉安始止。德宗病革時，傳各堂官入內，都御史張英麟以爲帝已崩矣，遽反穿羊皮褂以入，爲某王所訶而出，當時傳以爲笑。

花翎與古之貂蟬同，初唯近侍宿衛有之。康熙時皇子某欲之，求於上，特爲製五眼花翎賜焉。自後雖福文襄有大功，僅得四眼而已。宗室子弟，年十二能試箭者，得賜翎冠上，但綴翎無頂戴，名之曰空花翎。餘則以賞軍功。昔日漢文臣賜翎者甚少。自捐例開始，人人可得。其極也，僅費二百金。故外省官員，幾於無人不翎矣。六品以下官，如有賞賜，僅得戴藍翎。其用於花翎者，無眼而已。

自八分鎮國公以上，均戴寶石頂，色正紫，無頂柱，故不穿眼，下鑽二孔，以綴於冠。然三品之明藍頂，亦曰藍寶石頂，亦可不用頂柱也。又有紅絨結頂者，向唯御用，間以賜臣工一二人而已。

黼子卽黼黻也。親王四團正龍，郡王四團行龍，貝勒二正龍，貝子二行龍。公侯伯蟒，子男斗牛。自餘諸職，多沿明制。御史及按察司用獬豸，以其能觸邪也。文臣之世襲武職者，俗傳文前武後，其實非制。官在世職下，可用世職服。官在世職上，卽用本身服。嘯亭雜錄載金司空簡以尙書兼都統，輒繡一小麒麟於仙鶴補上，大遭詰責，殆亦誤於俗說也。世傳宋王黼，以帝拍其肩，遂繡一龍爪於肩上，此尤章黼之笑林歟！

行裝之制，舊用於扈從行圍，後則奉差赴任者皆服焉。會典，行袍、行裳，色隨所用。行裳多以皮爲表，佩帨，素布視常服，帶微濶而短。按行裳卽今之馬褂也，行袍卽缺襟袍也，皆以便於乘馬。佩帨，滿人謂之荷包、手巾，漢人名之忠孝帶。俗傳荷包貯毒藥而帶，備自縊故，亦無考。梁荊林謂隨扈時，倉卒有犯

儀衛者，備此帶爲馬上縛賊之用，或爲近之。

五品上文官得挂珠，而禮部、太常、光祿三署官員，六品下亦得挂之。以承辦典禮，供給御前也。內廷行走人員，則不分品級皆得挂珠。昔人嘲中書詩，所謂「有時溜到軍機處，一串朝珠項下垂」是也。然此尙言昔日之中書，同光以後，題本既廢，中書並不得至軍機矣。

外挂之制，五品以上，始得用貂及猞猁獬。自後唯貂有制，猞猁獬則聽人用之。五品下，唯編檢、軍機章京准穿貂，翰林多清貧不能製，則有一種染貂，俗所謂翰林貂也。又有帶藤貂挂者，以賞親貴，每挂之藤凡七十二，甚可罕貴。滿制，凡有君后、父母、主父母之喪，皆剪辮髮寸許，其意或以爲殉也。清末則國喪唯內府旗人用剪髮制。孝欽、德宗兩喪並出，內府人民髮皆再剪云。

旗下婦裝，梳髮爲平髻曰一字頭，又曰兩把頭。大裝則戴珠翠爲飾，名曰鈿子。袍褂如其夫之服，常裝之袍，長至蔽足，請安以雙腿，俗曰蹶安。蓋如西俗婦人見尊貴之狀。與平常人還禮，但以手上舉摸其髻，謂與拜同。履底高至四五

寸，上寬而下圓，俗謂之花盆底。袍不開氣，行時以不動塵爲有禮云。

宗親世爵之由旁枝入繼者，一切家政皆操於老福晉或管家之手。承襲者但嚴守家法，無絲毫之自由。此亦美法，具有深意。第法殊嚴厲，承襲子弟多以爲苦。載澤之夫人與隆裕后爲姊妹，澤亦旁枝承繼者，其初老福晉待之甚苛。一日，入見德宗，述及家庭之苦，德宗適有所感，輒持其手而泣，聞於孝欽，次日澤遂有守陵之命。

北方喪服較南爲重。滿族居喪，雖僅守孝爲百日，其期似短，然此百日中，家人皆白衣冠。漢人則伯叔父母之孝服同於所生，期服青灰布衣，帽履亦然。

婚禮爲不近情，新婦過門三日不下炕，並便旋亦不許，謂有則不吉。故婚期將屆，則女先減食。將及期，卽斷飲啖，日但用雞卵一二枚度日，可謂惡劇。

滿人家與府第結親，往往破家。蓋房族多，饒文煩，不堪酬應也。刑部同官善君，爲福元修相國孫，世爲貴族姻眷，家已中落。某日到署遲，曰：『今日又了却一酬應。』蓋赴某府相罵也。詢其故，曰：『舊姻多，酬應不了，俗必罵而

始斷，不必有隙也。』其可笑如此。然善君三女嫁伯王、恭王、洵貝勒，卒以是破其家。國變後，至墮落爲某部書記，困窮以卒。

北京人家，喪則親報，有喜慶事，亦必主人或其子弟親詣親友家，一一請之，匪是則不敬。滿洲貴族，儀文尤重，其於大宴會中，客有後到者，必循行各座，遇尊長，則雙膝着地，曰『摠安』。弟向兄請安，兄以雙手扶之，曰『接安』。平行則各屈一膝。中有日前曾邀飲，或承餽贈者，必再屈膝以謝。或雜有漢人，則以長揖。於紛紜雜錯中行之，不疾不徐，安閑彬雅，此旗下親貴之長技也。

宗室之殯，柩前有一木如葫蘆狀以爲別。八旗殯前各樹其所隸旗。殯儀有駝馬、帳房及黃鷹、細犬之類，皆示不忘射獵游牧之本。

滿族弔儀，必奠、必哭、必慰，此皆合於古禮。然亦有過情之舉，某友有妻喪，一旗友往弔，入門而號咷焉。然此特同寮之浮泛者，妻又少卒，同人皆訝焉。或私詢之，則曰：『臨喪不哀，聖人有戒，寧必有所慟邪？』嘗見酬應多者，往往號畢而不知沒者爲何人，謂之文過於情可矣。

宮門護軍，見長官至，則羣呼曰「伊利」，滿語立也。官員入署，門役呵導，堂官聲長，而司員則短，俗又謂之半聲道。老役云，其聲卽虎威二字之切音。

滿語蘇拉，閑散也。昂邦，大臣也。故散秩大臣曰蘇拉昂邦。而閑散旗人，供役內廷，或各衙署者，統曰蘇拉。入覲官員，初入宮庭，則羣蘇拉包圍之，各報瑣事，藉索犒資，亦名之曰海蘇拉，以其無一定秩務也。其軍機奏事等處之蘇拉，則有專責，與內廷宦者通聲氣，亦能作威福矣。

包衣卽僕役，意其音義，與英語頗同。凡旗三隸內務府，謂之下三旗。各王公府第亦有包衣，率發遣投靠者，必奉特旨始可脫包衣籍而入八旗，謂之抬旗。然內務府官缺，皆包衣旗人爲之，其親近膏腴，又爲朝官所不及。內務府大臣曰包衣昂邦，司員曰章京。

內務有慎刑司以掌宮監之刑法，宮監有罪，皆杖脊。杖以竹爲之，死刑亦以杖，則灌鉛於竹，往往數杖卽決云。

樂部以王大臣領之，署在西安門內。凡宮廷宴會、大典、郊廟、祭祀所司皆隸焉。神樂署則仍屬太常，另有和聲署隸於內府，俗所稱南府者是。優伶皆內監所習，多崑弋。季年宮中演戲，始有皮黃，而命伶人之有聲者入爲教習，亦得賜冠戴食俸。如李順、譚叫天、孫菊仙輩，儼然供奉矣。及田際雲入官，秦腔亦大盛。

舊京瑣記

卷六 考試

考試取士爲清代登進人才唯一之途徑。然至於末年，風亦稍稍替矣。但京官仕途，尙不蕪雜。凡以別途進者，限制極嚴，差缺升途皆無望也。其有納貲爲郎者，率皆科舉之士，先納一官，以爲留京應試，揣摩風氣之地。天下英才入吾彀中，殆人主牢籠才傑之長策歟？

北京市面以爲維持發展之道者有二：一曰引見官員，一曰考試舉子。然官員引見，有憑引期限，其居留之日短。舉子應考，則場前之籌備，場後之候榜，中式之應官謁師，落第之留京過夏，遠省士子以省行李之勞，往往住京多年，至於釋褐。故其時各省會館，以及寺廟客店，莫不坑谷皆滿。而市肆各鋪，凡以應朝

夕之求餽遺之品者，值考舉之年，莫不利市三倍。迨科舉既廢，市面遂呈蕭索之象，於朝於市，其消息固相通也。

大考以試翰詹，十年一舉行之，一等超擢，編檢立升讀講學士。二等前列，得升五品。次亦得優賚。其居劣等者，輒至降革，仙凡之分在須臾。故翰院諸公，遇此關者，莫不喜且懼也。德宗初年大考，時望頗屬張南皮。南皮文思敏捷，是日獨遲滯，給燭始畢卷，竟不獲上選。第二次大考，曾貞白廣鈞，文正之孫，最有時譽。乃入闈，覓人談笑，日下暮矣，始草草畢事，亦不獲雋。一等五人，南海戴文誠師與焉。同邑陳御三編修，本擬二等第一，有忌之者，謂其輕薄，抑置三等。末復爲李莚客所劾，交院察看。陳蓋嘗與張御史之弟同狎一妓，張語於李，謂其好爲人捉刀，實則亦無左證也。余嘗謂其被擯似溫飛卿，後竟沈滯以沒。

鼎甲妙選，雖糊名，然亦微講聲氣。同光以來之殿撰，如徐郃、陳冕、黃思永、吳魯、張建勳，皆由拔貢小京官，考充軍機章京，倖直樞廷，藉其聲譽故

也。次則邊省舉子，留都過夏者，如劉福姚、夏同龢等，皆雋才。銳意結納時流，平日師友，早有定評，蓋皆非漫然得之者。詩片之目，亦昌言無忌者。大致平時以楷樣遍呈師門，或世交當道之有閱卷資格者。暨出場，則書卷中詩之前二句；殿試則策之前一行，馳馬遍遞，力不足則朋好代爲遞之，至次日閱卷命下，卽不及矣。進士往聽臚唱者，恆不及百十人，皆夙精書法，或有力之詩片已遞到者爲有望。自餘諸君，自知不能入選，亦不作此夢想矣。

壬辰常熟主禮闈，搜張季直謄之卷甚力。某房得蘇籍一卷，古雅樸茂，同座傳觀相嗟異，謂必張卷，拔冠羣士。暨唱名，則武進劉可毅也。遍詢諸房考，無知此名者，常熟甚懊喪。劉字葆真，亦世家宿學，向在許仙屏河帥幕。初名某，旋夢某科會元爲劉可某，下一字模糊，但辨右爲父，臨試更名焉。暨中式，入謁常熟，詢其家世，並省爲宿學，亟爲延譽，一日而名滿都下，遂與館選。後劉常疑毅字近殺，同輩亦以「可殺」戲呼之，頗有懷刑之懼。庚子拳亂，竟被戕焉。朝殿試卷忌錯落，實無此功令。特士子懼不能置前列，故加意爲之。但風簷

寸晷中，亦所難免。於是應試者多習打補子，精此道者，以極薄之刀，將錯處輕輕刮去，復於本卷閒處，刮取紙絨勻鋪於上，以水潤溼，使之黏連，殊有雨衣無縫之妙。但藝稍生疏，或下手微重，穿紙成洞，又謂之開天窗。雖有佳卷，勢難前列。先伯伯晉司寇，屢充閱卷差。謂閱卷時，先將卷扯開，向日平視，無補綴痕，始細讀也。殿試卷無橫格，亦有深意，蓋對策無限篇幅，苟有長策可自由書寫，迨後專講書法與款式，失本意矣。余戊戌朝考，卷中誤書二字，亦忍俊不禁，打二補子，後謁閱卷鳳竹岡司空，謂余藝疏而運佳，蓋於進呈後，補處即脫落也。

試卷落字無上選，本不盡然。聞之徐頌閣相國，謂渠在軍機，已有升騰之勢，無望於館選，試卷偶落二字，即附注於旁，決不作問鼎計。傳臚日，適逢入值，隨衆往觀，忽唱及己名，倉皇中冠服不備，借人用之，由友人扶而上焉。

文道義試策，用閭閻字樣，落一閭字，遂書下句之而字。既覺，乃以而字上添筆成面字。故時有「閭面榜眼」之誚。按吾鄉秦澗泉殿撰，朝考詩題爲「講易

見天心得心字」，秦乃忘押心韻，竟得上選。後經磨勘，上謂狀元有無心之作，主司無有目之人。「無心狀元」與「閬面榜眼」，可謂有偶矣。

向來殿試，惟重楷法款式。自甲午喪師，舉國憤慨。乙未會試，四川駱成驥殿撰，首用「主憂臣辱，主辱臣死」之語，掃除向來頌揚忌諱積習，閱卷大臣傳觀稱歎，然不敢置鼎甲。進呈時，列之第九。德宗獨喜其忠憤抗直，拔之第一，異數也。然亦終不得大用。

光緒癸卯，張文襄以鄂督述職入都，特派閱卷故事，唯阮文達元以滇督赴都，兆武襄惠以定邊將軍凱旋，均被此命。故文襄有紀恩詩云「阮文兆武吾何敢，忠孝專求鄭毅夫」之句。

光緒癸卯考各省試差，雲南貴州二省，以道遠最先點放。是年雲南正考爲李哲明，副爲劉彭年。貴州正考爲張星吉，副爲吳慶坻。合四人之名爲「明年吉慶」四字。蓋次年值孝欽七旬萬壽，樞臣特弄此巧獮以爲媚竑。然以掄才大典，而事近於游戲，亦當軸之失措也。

光緒一朝，所取狀元皆不得意。陳冕早逝。黃思永以無罪陷獄，昭雪後，亦不得大用。趙以炯、劉福姚、駱成驤，皆偃蹇終身，並不得開坊晉一階。夏同龢、劉春霖、王壽彭，皆俯首入學堂而充生徒。夏復游學東洋，畢業亦竟不用。張建勳、吳魯得外放提學使，已爲多幸，然與捐納之候補道，其升途正相似耳。唯張謇以經營實業起家，以視先代鼎甲由清貴而直躋清要，蓋不可以道里計。殆科舉將廢之先兆歟？

光緒晚年，有經濟特科之試，蓋等於清盛時之博學鴻詞。由三品上京堂及各督撫保薦，不拘資格，考取第一名爲梁士詒。或有譖之孝欽者曰：『此人粵籍而梁姓，蓋康有爲之弟子，而梁啓超之兄弟也。』孝欽甚怒，梁聞而逃之香港。

科舉既廢之後，湖南王壬秋闈運，年已七十矣。忽被薦入都，特賞檢討。同時出洋游學生，畢業回國者，方與考試。有牙科徐景文者，亦得授館職。壬秋戲爲詩云：『愧無齒錄稱前輩，幸有牙科步後塵。』其語甚趣，此殆詞林佳話之尾聲也。

卷七 時變

時無變也，變於人心而已。清自洪楊事平，而疑忌漢族之心轉甚。蓋其入主中國以來，戡定四方，皆以親王貝勒爲大將軍或經略。粵亂之起，賽尙阿、向榮、和春相繼敗績，乃不得已而用曾、左、李，卒成中興之功。然朝廷疑畏之心益起，湘鄉一門鼎盛，被忌尤甚。觀於文正末年之惴惴寅畏，可見也。夫以向來之藐視漢族者，一變而爲疑忌，則君臣之局變矣。文宗以來，天下騷然。孝欽以一婦人，誅端華、肅順，以清心腹之患。用曾、左、李，以成中興之績，功亦偉矣！然大亂旣平，由祇懼而入侈泰，事娛樂而忘邊備，以致甲午之敗。因畏外而仇外，再致庚子之亂。流離西幸，卒賴數漢大臣，保東南，成和議，迎駕回京。

痛定思痛，彼時似有復興之望，未幾而淡忘焉。保持權勢，宵小中之，而宮闈之局變矣。再世無儲，旁枝入繼，恭、醇互長於光緒之初，宗族、家人並亂於光宣之際。各樹私黨，互爲傾軋，而執政之局變矣。新署立，而用人之資破，卑微新進，皆有出位之思。都城亂而搶掠之風行，貧苦市民遂起挽和之想（挽和義見下），則臣民之局變矣。總此諸因，造成時局，故謂時變由人心也。

舊都東西兩門曰崇文、宣武。按明緒亡於崇禎，易相五十餘，卒不獲一良弼，其禍實肇於文。清社亡於宣統，練兵二十四鎮，終不得一干城，其敗實由於武，若有先機焉。

光緒乙酉、丙戌間，京畿謠言四起，兵部侍郎王文錦精天文、術數之學，密奏宮中，謂將有西狩之事，於是修儀鑾殿以居焉。移蹕西苑，以厭謠讖，然終不能已。庚子之行，謠讖之興，往往而應，自古有之。然不能修德，以轉天心，而轉興土木，歷史末季，蓋如出一轍也。甲午六月十五日夜，大雷雨以風，大木斯拔，大清、天安、端午、太和諸門，其根皆折而爲兩，宮樹抱合圍者，縱橫偃

仆，爲北京向來未有之風災。

己丑十二月，太和門災起午刻，迄酉始漸息。舉市驚惶奔走，赤燄摩空，凝結不散，遙望亭亭如蓋。次年值孝欽七旬萬壽，復修不及，則由棚匠紮一假牌樓將事焉。

庚戌二月某日，自燕至汴千餘里，一夜陰雨。曉起則樹木皆晶瑩如玉，如玻璃，風搖之，一片金戈鐵馬聲。按此名木甲，相傳爲兵戈之兆。又曰木架，俗云木有架，達官怕。

辛亥七月，市中喧傳太白經天。按漢書五行志：太白曉出爲啓明，晝見爲經天。太白經天，天下革，民更王。十月某日午刻，日之兩旁有白氣兩團，又有白氣二道貫日而過，余蓋親見之。按五行志謂之日生珥，又曰白虹貫日。此在科學上之理論，不過蒙氣之變徵，然適當其時，遂成災異矣。

庚子兩宮倉卒西行，乘輿不及備。德宗著黑紗長衫，孝欽、孝定均白葛衣，裝束如民家，乘破騾車以出。至懷來，縣令吳永，固曾惠敏之壻也，奔迎於境，

進食焉。其夫人新逝，所遺衣服，進兩宮而御之，始得具湯沐。孝欽感之，卽日得旨擢道員，隨扈西行。

貫市李者，以標局起家，固素豐，頗馳名於北方。兩宮過，迎而進食，甚具備。命其子姪隨扈以西，各予五品官。殆亦等於溲沱麥飯矣。

珍妃不爲孝欽所悅，旣貶長門，庚子變起，孝欽倉卒召之出，推入古井，命宮監推垣一堵以覆之。次年夏，始起而殯焉，貌如生。迨崇陵成，復起金棺，附於德宗、孝定之旁。

宮駕之出也，鄭王某體極肥重，幾三百斤，平時偶步，須三四人架掖之。是日倉皇出國門，喘汗相屬，竟死於途。

庚子之變，殉難最烈者爲崇文山一家。崇固孝貞后父，又爲帝師。旣自縊，其子葆初，集家人掘地爲大坑，同殉焉。文臣之殉者，徐蔭軒相國桐、王連生祭酒懿榮皆自縊。吾鄉成漱泉大令，詞章峻潔，時爲直隸某縣令，聞變，慷慨以殉。疏逃卑官，視諸公爲尤難已。

拳亂之起，起於民乎？實起於宮掖間耳。德宗被幽，大阿哥立，其父端王，不學無術，或勸之立大功以定廢立之局，於是白蓮教之餘孽，得張其「扶清滅洋」之幟焉。其瑣事已備於各家之紀載，余嘗推當時朝野之心理。一曰好聽戲：昔見宮中之戲臺，神仙自上而下，鬼怪目下而上，鑼鼓喧闐，百色妖露。談聖母而心驚，聞悟空而色變，上下同一思想，以致演成大劇。一曰愚昧：當時某王宣言於朝曰：『天下安有許多國度，鬼子之有力者，祇京津一把子人耳。』其無識可笑如此。又北京人好爲大言，自謂天朝，人皆夷狄。明明通商，謂之歸化，明明贈饋，謂之貢獻。自清以來，上以之自負，下以是貢諛，固應收後來之果耳。

兩宮既行，宮監陸續赴行在，勢極狼狽，迨廻鑾而氣餒復張矣。友人某，官戶部，自西安押檔案歸。至正定上火車，行裝畢卸，有馬監者後至，揮令下，勢甚橫。方枝梧間，一監巾黑帕，怒馬至，羣璫肅然曰：『崔總管來矣。』崔詰爭執之由，笑謂馬監曰：『老馬，吾輩皆當差，不妨與諸先生同乘也。』友人始得上途。

兩宮既出，京師無主，搶刼之風大盛，貧兒驟富，衣飾穿著，皆不知所云。秋風甫起，已狐裘滿街。及冬至寒冽，洋兵分段駐守，搶者之資已罄。秋著狐貂者，冬不免綴報紙以蔽體耳。搶匪當與高采烈時，其言曰：『今日無皇上，吾輩須挽和挽和。』其意蓋均貧共富也。迨和議成，秩序定，百工賤役復歸其職，則變其言曰：『爺輩終是爺輩，孫子仍孫子耳。』

兩宮廻鑾，排日召見臣工，泣涕引咎，殊有自新之望。惜久則漸忘，終於不振。當時五品上實缺官，皆輪班召見。某部郎，國戚也。召見時，孝欽知其家世，慰諭甚至。詢其家室安否，某驟接尊嚴，皇悚失措，遽對曰：『奴才是德國。』再詢，對如初，乃揮之出。蓋當日洋兵，分管地段，而德國所管，騷擾最深。某蓋欲訴其家所受之苦，而辭不達意，當時傳以爲笑。

當洋兵分管地面時，犯人治罪，仍送刑部行之。余常見其公文甚簡單而明括，曰：『犯人某犯何事，應何罪。』如是而已。迨刑部復審，則不必依其來文，仍按律定刑書焉。

庚子後，訟獄最繁，大率爲報復之事。蓋拳亂時，有隙者動以信洋教，二毛子相板控（二毛子卽教民）。庚子後，則率以恃拳作亂相控。中以王維勤一案爲最鉅。王直隸某縣舉人，橫於鄉，與戚李姓有隙。拳勢張時，王率其二子及所帶拳團殲李家十餘口，並有其資產。李媳皆馬氏，次媳小李馬氏者，明慧有姿首，王欲留以爲媳，僅得免，乘隙逃入京，時已迴鑾，那桐爲步軍統領，奔訴焉。逮王及二子，刑部讞定，王凌遲，二子皆棄市。壬寅之春，刑部獄中最爲興盛，收三犯：一蘇元春，一沈鵬，一賽金花。蘇於越南之役，頗著聲威，及爲提督，爲岑西林劾，逮問。沈則維新志士，近世「轟天雷」一書，卽敘其事。賽之歷史，人人知之，時以虐斃養女，被收。三人於一月中連翩入獄，時提牢爲閩縣卓芝南孝復，余嘗笑謂：『名將、名妓、名士，皆注公門矣。』後沈奉密旨杖殺，杖時委頓甚苦，求縊之，而隸役相顧，不敢予以繩，卒解其足帶而拉殺焉。蘇戍新疆，竟歿於戍所。相傳蘇在鎮時，歲輦鉅金進宮中及朝貴以爲常，又有偉績。及被逮問，莫敢爲道地，見當時司法尙能獨立也。則賽竟援贖例，解回原籍，復賈

笑於滬。

庚子之役，德將瓦爾德西爲聯軍司令，踞儀鸞殿。賽金花者，故某公使下堂妾，曾隨使節，於西語甚嫻習，既復入風塵，遂應德將之召，頗能相機援救難民，或爲貴人之陷在都城者排難解紛。於是羣奉之曰賽二爺，實則德將仍以娼妓待之。時人附會，乃謂其隨節時卽與瓦有情愫云云。曾詢之賽，笑其全非事實。庚子鉅創以後，都人心理由輕洋仇洋，一變而爲學洋媚洋，婦女出門，必銜一香煙以爲時髦美觀。嘗見數乞丐臥便溺狼藉中，亦檢一殘餘之紙烟，跂足而高眠焉。

自辛丑至辛亥，十年之中，由厲行新政，進而爲批准立憲，再進而爲實行憲政，更進而爲虛君共和，然皆無實心誠意以行之，徒爲敷衍文章而已，故終至於遜位亡家。

親貴出洋，自載振之考察商務始。繼而五大臣之考查憲政，則以載澤爲主體。而載濤之賀加冕，載洵之考查軍制，相踵而起。余嘗與友人笑言：『今日之

出使，幾等諸清初之統兵，一若人才皆在親貴中，非是莫屬者，此何故邪？」

吳樾炸車之案，余以座師戴文誠在行中，亦往送焉。立稍遠，車將動矣，忽聞轟然一聲，疑爲放炮，然都城大員出城，無升炮例。既而見前立者，紛紛向後退，繼而紛傳車上有擲炸彈者。俄見二人掖文誠下，又數人掖載澤下，則所服黃馬褂遍染桃花色矣。又見昇二人下，一則紹英，一則隨員薩蔭圖也。站傍有一僕人狀，僵臥，已氣絕矣。吳桐城人，爲吳摯甫之族姪，留學東瀛，是日懷炸彈冒入車，未及擲放，爲人擠於車門，遂爆發，半身皆燼。

清季之練禁衛軍，眞棘門灞上兒戲事耳。服裝鮮明，招搖過市，一老軍見而嘆曰：『此軍每人可值百金，獲一吾可致富。』蓋羨其裝械之精美也。其操演亦用新法，然不脫梨園武行習氣。

宣統之登極也，其父攝政王抱之而升，淨鞭甫鳴，宣統大啼，攝政王慰之曰：『皇帝別哭，一會兒就完了。』烏乎，其語誠驗。攝政慰宣統語，蓋近侍親聞之，當時以告人者。

武漢事起，清廷應變，殊多可怪。當時派陸軍大臣蔭昌率陸軍由京赴漢，而海軍大臣薩鎮冰以艦隊會於長江。某君聞之，曰：『敗矣，此所謂殺手鐮也。陸海兩大臣同時並出，苟一挫折，孰繼其後？』

革命軍起，西南騷，而北部猶宴然也。自某大臣者倡漢奸之說，於是漢官朝士，乃紛紛携眷引避。自吳祿貞反正之訊達於都下，於是有盡殺漢人之謠傳，其實無稽也。然談者色變。憶辛亥九月某日，風信最緊，時余亦率婦孺赴津。車中人極擁擠，尤多西人。同座某英人神色極爲倉皇，大率懲於庚子之役也。既而車開動，英人向余拱手作華語曰：『恭喜！吾輩脫險矣！』蓋謠傳是夕殺在京漢人及外人也。

清之亡也，仕宦中變道士服者，甯藩李瑞清。爲僧人服者，大理定正平。誓必死而卒未引決者，貴東道文悌。惟宗人府供事張瑞斌者，投牒都憲張英麟與前，請代奏收回遜位詔書，勿失祖業，都憲懼，勿敢受。瑞斌遂引刃自殊，此爲一代之終應有之點綴。然但出於府史小胥，愚不可及矣。

卷八 城廂

明崇禎之際，題北京西向之門曰順治，南向之門曰永昌，不謂遂爲改代之讖。流寇入京，永昌乃爲自成年號。清兵繼至，順治亦爲清代入主之紀元。事殆有先定歟？禁城東華西華二門對峙，然至民國則中門易爲中華，亦若預爲之地者，謂之巧合可矣。

宣武門月城內舊有土墩五，俗傳以祭火氏之兄弟五人，曰：仁義禮智信者，其實非也。舊日地勢，內城高於外城，京城西面多山，夏秋雨盛，則城中之水外注，宣武門宣洩不及，最易存積，五墩蓋以誌水。若水與墩平，則急須閉門，否則不克下鍵矣。老輩所言如是，似爲近之。

舊日漢官非大臣有賜第或值樞廷者，皆居外城，多在宣武門外。士著富室，則多在崇文門外。故有「東富西貴」之說。士流題詠，率署宣南，以此也。近人不察，似以宣南爲京寓之統稱，乃有飲肆在西長安街，而署名曰「宣南春」，可笑也。

前清前三門晚六七時卽下鑰，至夜半復開，以通朝官。故居內城者，如有城外飲宴，必流連至於夜半，曰候城門，亦曰倒趕城。至清末，則崇、宣兩門皆不閉，而前門獨下鍵，似宵小入城，必須由中門入，可怪也！

京師白塔，在阜成門大街。按草木子古今諺云：『元初童謠有：「塔兒紅，北人來作主人翁；塔兒白，南人作主北人客。」』之語。元世祖時，塔焰赤；明祖起兵淮陽，塔白如故。燕都遊覽志：『成化元年，於塔座四週，塼造燈龕一百八座，相傳西方屬金，故建白塔以鎮之。』

俗稱煤山爲萬壽山，其實非是。陶九城輟耕錄載：『萬壽山在大內西北，太液池之陽，金人名瓊花島，中統三年修繕之，至元八年賜今名云。』按，卽今北

海之「瓊島春陰」者是。明宣宗實錄：『宣德三年春，奉皇太后遊西苑，親掖太后升萬歲山。』時楊文貞、李文達皆有賜遊西苑記，亦皆稱萬歲山。高江村金鼇退食筆記謂：『茲山所疊石，皆金元故物，或本艮岳之石，金人載此自汴至燕，准糧若干，俗呼折糧石云。』

圓明園舊有二石，曰大青、小青，故老相傳，或呼爲「破家石」。謂清高宗南巡至某地，見二石愛之，而惜其難移。有某富家願悉家資運之，二石至京，而鉅產破矣。此語固亦無可考。石上皆有高宗題詠，其巨偉亦殊可驚。小青今已移置中央公園之來今雨軒。

圓城卽清之承光殿也，高江村筆記載：『在金鼇玉螭橋之東，圍以圓城，設睥睨，自掖洞門而升，中構金殿，穹窿如蓋，華棖綺牖，旋轉如環，俗曰圓殿』云。按，今殿之丹墀置大玉甕，黑質白章，其玉材之偉大，爲世罕見。上覆以亭，當時臣工題詠甚夥。蓋高宗駐蹕烟郊時，得之破廟中，事見嘯亭雜錄。又殿中供玉佛一，高與人齊。相傳爲嘉慶時，西藏所貢，凡三：一供大內、一供雍和

宮、一則供圍城，故江村記中未得載之。

京師白塔有二：一在阜成門內，一在北海。按順治八年，毀萬壽山之亭殿，立塔建寺，樹碑山趾。康熙己未，地震塔毀，次年重建焉。清會典載：設白塔信炮總管，隸內務。蓋大內以萬歲山爲最高，內外有警，以白塔信炮相告。又清制，十月二十五日，自山下燃燈至塔頂，喇嘛率經其下。

今之琉璃廠，卽遼之燕下鄉海王村也。考朱笥河文集載：『乾隆三年，琉璃廠客戶掘得古墓，有志石，題「遼銀青光祿大夫檢校司空行太子左衛率府率兼御史大夫上柱國隴西李公墓誌銘」。其文曰：「公諱內貞，字吉美，嬀嬀人也。以保寧十年六月一日薨於盧龍坊私第，葬於京東燕下鄉海王村。」』以此可見京師城郭之變遷，今人呼琉璃廠爲海王村，蓋始於遼。

西華門內之劉蘭塑胡同在後門外，卽劉元之故居也。考元史工藝傳：『阿尼哥尼波羅國人，授人匠總管。有劉元者，從阿學，亦稱絕藝。』元字秉元，寶邸人，兩都名刹，塑土範金，出元手者，神思妙合，官昭文館大學士，嘗奉諭：非

有旨，不許爲人造像。

順治門內之天主堂，明萬曆爲利馬竇建也。利後封通微國師，故大門題額曰「通微佳境」。予初入京，猶見之。至庚子被燒改建，始去焉。按花村看行侍者談往云：『利馬竇大西洋人，入京師建天主堂於宣武門內，卒於萬曆之庚戌，以陪臣禮，葬阜成門外三里許。』

談往又載：『西城藍靛廠，萬曆間始建西頂娘娘廟於此。』地素窪下，有狂人倡爲捐土之議，都城男婦筐擔車運，囊盛馬馱，處女妖姿，身坐轎中，各懷土袋以邀福利，一時若狂。然不數年，遂有遼陽捐地之事。

大光明殿今但名之曰光明殿，在西安門內。昔日建築甚宏麗，後並撤廢，但有遺址尙極寬濶耳。按，清世祖逝世，顧命四大臣索尼、鰲拜、遏必隆、薩克薩哈，同來焚香，盟誓於此。

旃檀寺舊名宏仁寺，康熙時，迎旃檀佛居之，俗乃呼旃檀寺焉。有御製碑文云：『自西域傳至中國，歷二千六百五十六年。』今此佛不知何往矣。

旃檀寺之西，有騰禧殿舊址。聞當日覆以黑琉璃瓦，俗呼爲黑老婆殿。按明武宗西幸宣府，悅樂伎劉良女，載歸，居騰禧殿。出入挾以自隨，有馳馬失簪一事，李笠翁玉搔頭傳奇卽演此事。其傍有王媽媽井，今則並遺址不可尋矣。

西山碧雲寺，元之碧雲庵，耶阿利吉所建。明內璫于經拓爲寺，魏忠賢重修，兩璫皆立塚於是。然于下獄死，魏戮屍，皆不得其終也。康熙時，御史張瑗請毀魏璫碑額，其大略云：『香山碧雲禪院呼于公寺，詢之土人，知逆璫之墓碑後刻有孝官孝孫等六七十人姓名。乞卽飭立仆其碑，剗平其墓。』奉旨：『魏忠賢碑墓著交該城官員仆毀剗平。』按，魏墓道雖經剗伐，遺址至今猶在也。

北京梅樹無地栽者，以地氣沍寒也。城中惟貝勒毓朗園中一株，蓋坑地熾炭，作玻璃亭以覆之。城外則惟湯山之園中有之，地屬溫泉，土脈自暖。余嘗於二月中過之，梅十餘株與杏花同時開放，惜皆近年補種，無巨本也。池中荷錢已疊，亦關地氣。

昔日三海等處，皆爲禁地。夏日南人好水，嬉者東則東便門外之二閘（卽通

惠聞），赴通州之河道也。河流如帶，破艇三五，篙人裸體，赤日中撐舟，殊無佳景。北則德勝門之積水潭。南則彰儀門之南河泡，高柳長槐，稍有江鄉風景。城中則爭趨於十刹海，荷田數頃，水鳥翔集，隄北有會賢堂，爲讌集之所，憑欄散暑，消受荷風，土流樂之。厥後種荷人索資於會賢堂，不滿所望，乃壅而爲稻田，殺風景矣。

外蒙賓館，昔日在東交民巷北者曰內館，在黃寺傍者曰外館。年班王公，迨秋而集，如鴻雁然，福晉郡主亦至焉。昔於荷包巷見數蒙族貴婦，高車而過，遍視各物，有忤羨意。一婦見小洋錶，竊懷之，肆人若無見。俄出單購物，匆匆而去。詢之肆人，曾見竊者否，曰：『見之矣！患其不竊耳。彼輩一有懷挾，卽不論貨價，且他日必再來吾肆，所得不已多乎？』蒙人之愚，與肆人之狡如是。

法源寺唐之憫忠觀也。丁香最盛，中有石幢，爲遼代舊物，壁嵌唐蘇靈芝碑。又一碑爲史思明書，其結銜爲御史大夫幽州太守。

京西花之寺其名甚雅，而無故實可考。頃讀「天錄識餘」，謂青州亦有花之

寺，亦不識其命名之義。

長椿寺向藏九蓮菩薩像，蓋明神宗后像也。明思宗小皇子病篤，時呼九蓮菩薩，責薄待后家云云。見明史稿。寺院楸一株最高，花時遊人甚盛。

崇效寺最古，唐之棗花寺也。牡丹最盛，爲都門遊覽之一。寺舊爲明之遺民以供思宗神位之處。舊藏有青松紅杏圖，當明鼎革，有邊將者出家於寺中，繪茲圖，蓋有感於松山杏山之役也。自清初，名人題詠都遍，厥後寺僧不肖，此圖押之質肆。庚子後，流轉入楊蔭伯京卿手，卒歸之寺。又有馴雞圖，無足觀。

前門左右，舊有東西荷包巷，顧綉荷包諸肆，鱗萃櫛比，朝流士女，日往遊觀，巷外車馬甚盛。前門改建後，始盡撤之。

北京街市在未修馬路以前，其通衢中央皆有甬道，寬不及二丈，高三四尺，陰雨泥滑，往往翻車，其勢甚險。詢之故老，云：此本輦道，其初駕過，必鋪以黃土。原與地平，日久則居民爐灰亦均積焉。日久愈甚，至成高壠云。

舊日道路不治，雖有御史任街道廳，工部任溝渠，具文而已。行人便溺多在路途，偶有風厲御史，亦往往一懲治之，但頽風卒不可挽。光緒時，聞有某部曹便旋於道，適街廳過，呼而杖，部曹不敢自明爲某官，御史亦不詢其何人，杖畢，繫棍而去，人傳以爲笑。

大柵欄之同仁堂，生意最盛，然其門前爲街人聚而便溺之所，主人不爲忤，但清晨令人汎掃而已。蓋惑於堪輿家言，謂其地爲百鳥朝鳳，最發旺云。

昔有計偕人，戲爲京師立一醫方，云：人中黃、人中白、牛溲、馬勃、竈心土，各等分，無根水調勻之，用日曬乾，車輪碾爲細末，西北風送入鼻中，服之，令人名利之心自然消滅。

北京街道雖不治，然古昔之工程則甚備。各通衢皆有暗溝，以資宣洩，水患甚少。所謂大明濠者，皆用巨石砌蓋之，工極堅固，數百年來未嘗敗也。自修爲馬路，往往毀棄舊溝，一經盛雨，汪洋在途矣。舊例，四月開溝，則穢氣外洩，行人不愠，往往滅頂，亦殊可懼。昔有戲爲月令者曰：『是月也，臭溝開，闔墨

出，舉人化爲官，「來」乃發聲。』蓋呼僕曰：『來！』官體也。亦是惡謔。

卷九 市肆

京師之市肆，有常集者，東大市、西小市也。有期集者，逢三之土地廟，四五之白塔寺，七八之護國寺，九十之隆福寺，謂之四大廟市，皆以期集。又有所謂黑市者，在驟馬市一帶，夜四鼓而集，嚮明而散，其中詐僞百出。紀曉嵐筆記所云：『高麗紙綴爲裘，泥製髻鴨。』蓋自昔爲然，近已爲官廳禁止。夜市則在前門大街，以至東西珠市口，清末始有之。

銀號首推恒和、恒肇等四家，謂之四大恒。居人行使銀票，以此爲體面。昔與某旗下友人約赴城外觀劇，此友已更衣入內，久之，俄聞詬詈聲出，則囁嚅曰：『甚抱歉，需稍候也。』詢其故，乃憤然曰：『帳房可惡，竟以烟蠟鋪之票

與我（彼時烟蠟鋪亦兼兌換，並發行銀錢票），故痛責之，已往易矣。」余曰：『誤佳劇，奈何？』友則曰：『此無奈何，余豈可以此示人？』久之，僕返，則嶄新之四恒票，始歡欣而出。

當時某樞臣好積四恒票，百金一紙，萬金爲一束，疊置平正，硃印鮮明，時於燈下取出玩弄，以爲娛樂。已而不戒於火，屋中成束之四恒票並付祝融，四恒家乃大獲利市。

又有柳泉居者，酒館而兼存放，蓋起於清初，數百年矣。資本厚而信譽堅，存款取息極微，都人以其殷實可靠，往往不責息。有存款多年，往取而銀之原封曾未動者。

其下者爲錢鋪，外城則專與漢官往來。彼時朝官有定員，官之資格，鋪人一知之，且有外任之望，此輩錢鋪，隨時接濟，便利殊甚。又下則有所謂烟蠟鋪，亦兼兌換業，並出錢帖，往往出帖既多，隨時關門。而有一種人游行街巷，曰收買關門票，以少數之錢收集之。及收集將滿，則又報復業，此奸商之尤者。

逮宣統定鈔幣法，此弊始除。

滙兌莊亦曰票莊，皆山西人，交游仕宦，最爲闊綽。有外放官吏，百計營圖以放款。卽京官之有外任資格者，亦以奇貨居之，不惜預爲接濟。然失敗者，亦往往而有。莊之執事，皆爲財東之戚友，故不虞其逃匿。東家間歲一來查巡，布衣草屨若村民，大抵數日卽行。莊夥之衣服皆爲公物，及去職，仍以布衣歸也。

金店者初亦作金珠貿易，至捐例大開，一變而爲捐納引見者之總滙。其上者兼能通內線，走要津。苞苴之入，皆由此輩。故金店之內部，必分設捐櫃焉。其掌鋪者，交結官場，諳習儀節，起居服飾，同於貴人。在光緒季年，各種捐例並起，業此者，莫不利市三倍，然皆非其本業也，故譏者曰：『金店之金，在其招牌上所貼之金箔。』

綢緞肆率爲山東人所設，所稱祥字號，多屬孟氏。初惟前門之泰昌爲北京人，蓋兼辦內廷貢品者。各大綢肆必兼售洋貨，其接待顧客至有禮衷，挑選翻搜，不厭不倦，菸茗供應，趨走極勤。有陪談者，遇仕官則言時政，遇婦女則炫

新奇，可謂盡交易之能事。較諸南方鋪肆，訑訑之聲音顏色，相去千里矣。

福壽全者，津人閻某所設，在大柵欄，始於光緒末年。閻本官中書，家頗富有，復招多股，創爲大規模之商肆。自綢緞洋貨，以至中外之皮革竹木器具無弗備，如今滬上之先施等公司者然，可謂得風氣之先矣。然用戶之欠賁，鋪夥之偷漏，閻雖終日在肆監督之，卒以折閱破家，至投河而自戕焉。

北京工商業之實力，昔爲山左右人操之。蓋滙兌銀號、皮貨、乾果諸鋪皆山西人，而綢緞、糧食、飯莊皆山東人。其人數尤衆者爲老米碓房、水井淘廁之流，均爲魯籍。蓋北京土著多所憑藉，又懶惰不肯執賤業，魯人勤苦耐勞，取而代之，久遂益樹勢力矣。

昔有旗籍友人告予云：「滿清之盛也，漢軍人多爲魯籍，至皮島四將歸，而勢力遂入關內。然其衰也，亦由之。世族俸銀米，悉抵押於老米碓房，侵漁逼勒久，遂握有全部之財權。因債權故，碓房掌櫃之鄉親故舊稍識之無者，率薦入債家爲教讀，遂握有滿族之教權。於是旗籍人家無一不破產，並其子弟之知識，亦

無一不破產矣。』語雖近激，亦非無因。

昔居內城，隣人某，滿世爵也，起居闊綽如府第制。一日，余家人偶至街頭老米鋪，俄一少年至，視之即隣家之所謂某大爺者。見鋪長執禮若子姪，而鋪掌叱之，儼然尊長，始以罵，繼以詰，少年側立謹受，俟威霽始囁囁言：『今日又有不得已之酬應，仍乞老叔拯之。』鋪掌罵曰：『吾安有錢填若無底壑？』少年曰：『秋俸不將至乎？』鋪掌冷笑曰：『秋俸乎？汝家一侯二佐，領世職俸，養育孤寡，錢糧算盡，尚不酬所貰也。』少年窘欲泣，鋪掌徐檢松江票四兩，擲予之，曰：『姑持去，知汝須演探母也（市井惡罵指逛窰也）。』少年感謝持去，家人歸述之，相歎咤。俄而鄰家大鼓聲與嘻笑聲並作矣。噫！然則確房握滿人財權說，誠可信。

琉璃廠爲書畫、古玩商鋪萃集之所。其掌各鋪者，目錄之學與鑑別之精，往往過於士夫。余卜居其間，恒謂此中市傭亦帶數分書卷氣。蓋皆能識字，亦彬彬有禮衷。

藥肆有專售秘製一種，傳之數百年成鉅室者，其可數者，如醬坊胡同之莊氏獨腳蓮，土兒胡同同德堂之萬應膏，觀音寺雅觀齋之回春丹，鹿特角胡同雷萬春之鹿角膠，皆以致富。此外熟藥鋪，則菜市口之西鶴年堂、大柵欄之同仁堂，每年所作膏丹，行之各省，亦至鉅萬。

酒肆之鉅者曰飯莊，皆以堂名，如慶壽、同豐之類是也。人家有喜慶事，則筵席、鋪陳、戲劇，一切包辦，莫不如意。其下者曰園、館、樓、居，爲隨意宴集之所。宴畢皆記之帳，並可於櫃上借錢爲遊資，亦弗靳也。三節始歸所欠，然非至年節，索亦弗急。

南人固嗜飲食，打磨廠之口內有三勝館者，以吳菜著名，云有蘇人吳閨生閱讀，善烹調，恒自執爨，於是所作之肴曰吳菜。余嘗試，殊可口。庚子後，遂收歇矣。

士大夫好集於半截胡同之廣和居，張文襄在京提倡最力，其著名者爲燕山藥。曰潘魚者，出自潘炳年。曰曾魚，創自曾侯。曰吳魚片，始自吳閨生。又有

肉市之正陽樓，以善切羊肉名，片薄如紙，無一不完整。蟹亦有名。蟹自勝芳來，先經正陽樓之挑選始上市，故獨佳，然價亦倍常。城內缸瓦市有沙鍋居者，專市豚肉，肆中棹椅皆白木，洗滌甚潔，旗下人喜食於此。

月盛齋者以售醬羊肉出名，能裝匣遠賣，經數月而味不變。鋪在戶部街，左右皆官署。此齋獨立於中者數十年，竟不以公用徵收之，當時官廳猶重民權也。曰二葷館者，率以平民果腹之地。其食品不離豚雞，無烹鮮者。其中佼佼者爲煤市街之百景樓，價廉而物美，但客座嘈雜耳。

清時土木工多，殿廷曰欽工，陵寢曰陵工，官署城垣曰官工。或由欽派，或屬工部，或隸內府。一工程出，而主者之家，木廠商人麇集。其弊也，數成到工，卽爲核實。內城宅第，其曾筦工程者，多爲木廠報效也。木廠商之富實爲部人所艷羨，有樣子雷者（樣子京語卽打樣之意）年最久，蓋始於清初，長子孫者數百年。又有山子張者，以堆山石著名，皆屬於木廠廠商之包工也。先用最低價以取得之，然後以續估取盈，續估過於原估往往數倍，諺謂「十包九不盡」云。

京師瓦木工人多京東之深、薊州人，其規約頗嚴，凡屬工徒，皆有會館，其總會曰九皇。九皇誕日，例得休假，名曰關工。劇園飯館，坑谷爲滿，統名之五行八作。工人值陰雨停工，名曰挂碓。

質鋪九城凡百餘家，取息率在二分以上。鉅值者亦得議減。業此有名者，曰白某、婁某。一人恒管多處，曰總管。庚子之變，貧民相率而搶質肆，貧家婦女亦與焉。洋兵禁之，弗止，則鎗殺搶匪，而裸其婦女以辱之。未被搶者，僅一家有半耳。質肆歲以正月查其滿期之貨，估衣行咸往購取，謂之號貨。

皮貨估衣集於前門東之珠市口，以迄打磨廠。其曰東大市者，爲估衣陳列之地，曉集午散，詐僞百出。皮衣糟朽者，以紙或布貼其革表而出之，曰貼膏藥。同行議價，互以手握於袖中示意焉。

木器亦集於東大市，率爲舊式，檀梨硬木往往而有，皆舊家所售也。其在東西四牌樓者曰嫁裝鋪，並箱櫥奩具亦備硬木，率爲染色僞品。

酒行在崇文門外，向來爲二十家，皆領有商帖者。凡京東西燒鍋所出之酒，

皆集於是。近日凋零，不及十家矣。崇關酒稅重，故私酒之販亦夥，百出其技，至有以婦女行之，用猪脬灌滿藏於私處者。其售紹興酒者曰京莊，別有南酒鋪，不在酒行之例。

京師工藝之巧，蓋萃南北之精英而成之。歷代帝都四方筐篚之貢，梯航並至，有所取法。又召集各省巧技匠師爲之師資，故由內府傳及民間，成風尙矣。

南紙鋪並集於琉璃廠。昔以松竹齋爲巨擘，紙張外兼及文玩骨董。厥後清秘閣起而代之，自餘諸家皆爲後起。製造之工，染色雕花，精潔而雅緻，至於官文書之款式，試卷之光潔，皆非外省所及。詹大有、胡開文之墨；賀蓮青、李玉田之筆；陳寅生之刻銅；周全盛之摺扇；雖各設專鋪，南紙鋪皆爲代銷，書畫家之筆單亦備。在昔科舉時稱極盛，科舉停後，漸凋零矣。

市間花事，城外舊集於崇外之花市，宣外之土地廟，城中則東爲隆福寺，西爲護國寺。士夫公退，驅車過訪，自選名葩，誠爲韻事。昔有南花園者，蓋清初取四方所貢之名花異卉悉置於是，而徵各省之花傭收養之。又稱漢花園，在今大

學堂，已夷爲民居矣。

南京人在北京執工商業者曰緞莊，凡靴帽之材皆聚於此。初僅三家，所居在打磨廠之三義店。曰扇莊，亦祇二家，曰周全盛、曾萬聚。曰羊角燈店，惟吳姓者一家。昔日玻璃未盛行，宮中用之以防火患。曰刻字鋪與眼鏡鋪，其工人皆籍金陵，聚處琉璃廠，今猶世其業。又有織工，昔內府設綺華館，聚南方工人教織於中，江寧織造選送以爲教習。又織絨氈者，亦南京人，能以金綫夾絨織之，璀璨耀目，昔黃慎之創工藝局，曾訪得之。惜其工費太鉅，不克推廣，此藝遂成廣陵散矣。今緞、扇、羊燈之業皆廢，而一般工人亦於此長子孫，成土著矣。

商會之設，始於光緒三十年，時余官商曹，承乏其事。北京商人初不知此爲何事，甚且謂將斂捐，疑畏不敢前。余乃就所居廳事，月再召集，誘掖獎勵者半年，始克成立。迨條例既已頒行，商人始恍然於有利無弊，一年而報成會者十餘業。憶余當日所支之部款，月僅四十金也，今則遂成法團矣。

舊日都門市肆，亦頗留心廣告之術，特極幼稚耳。如黑猴公之帽鋪，櫃上踞

一大黑猴；雷萬春之鹿角膠，門上挂大鹿角；某扇鋪之簷際，懸一大扇；皆足引人注意。他若刀剪鋪之王麻子，眼藥鋪之馬應龍，則轉相仿倣，各不下數十家，互稱老鋪，爭執可據。

舊京瑣記

卷十 坊曲

都中戲曲向惟崑弋，弋腔音調雖與崑異，而排場詞句大半相同，尙近於雅。自崑弋變爲皮黃，雖鄭雅有別，尙不失雍容揄揚之概。其時各園於中軸前，必有崑劇一齣，而聽曲者每厭聞之，於時相率起而解洩，至譏之爲車前子，言其利小水也。迨於清末，秦腔盛行，促節繁絃，哀思噍殺，眞亡國之音矣。

劇園向聚於大柵欄肉市一帶，舊紀所載方壺齋等處，光緒初已無之矣。二簧班如四喜、三慶之類，秦腔如玉成、寶勝和之類，皆於各園輪演，四日一轉，蓋爲均枯苑也。戲價則每座祇京錢一千三百，視今日之名角登臺，一座輒須一、二金者，固非舊日名伶所能夢見也。

堂會演戲，多在宣外之財神館、鐵門之文昌館。其大飯莊如福壽堂等，亦各有戲臺。人家喜慶，往往召集。至光緒甲午後，則湖廣館、廣州新館、全浙會館繼起，而江西館尤爲後進，率爲士大夫團拜譙集之所。堂會演劇，必有主持者曰戲提調，支配角色，排列先後，指揮如意，無敢爭執。伶人所得資謂之戲分。因上座不佳而折扣之，謂之打釐。堂會所入較劇園爲多，然當長庚、三勝時，一齣無過十金者。鑫培、桂芬繼起，較增價值，亦祇二十四金而止，迨後日益增長耳。

梨園所供之神，羣呼曰老爺，廟曰精忠。子弟分二派，曰科班，入班曰坐科，專門學戲者也。曰私坊，雖亦學戲，其本業則應招侑酒，所謂相公是也。而皆隸於廟，故同業相爭而判曲直曰上廟。

梨園舊人，頗知守分，昔見俞菊笙、李順庭輩，居平常服青衣，年六七十里時，途遇官車，必垂手側立，俟過乃行。國興之五九，當新婚時，用冠服叩見尊屬，其祖母年八十矣，見而大慍曰：『此命服也，顧汝何人，乃敢僭用，亟褫

之！』五九涕而臥，時李順庭爲南府教習，得賞五品服，脫其冠冠之，始畢親迎禮。

相公中頗有尙俠之風，固由感激恩私，實亦戲曲中漸濡之化也。狀元夫人之前事，早在人口，卽後來梅巧玲之歸葬某君，五九之襤被關山送張樵楚之遠謫，俞莊之冒險菜市收立豫甫之遺骸，皆爲難能者。憶戊戌年有進士吳某昵楊小朵，榜下，以知縣分江西。歲暮矣，猶眷戀不忍去，衣囊亦罄。小朵屢資其行色，謂已出京矣，一日大風雪，遇之途，猶西華葛帔也。執手泫然，詢其踪，在破廟中。携歸，薰沐解裘衣之，爲之奔走權要，覓書以屬贛之當道，親送之津而別。吳至省逾限，例應白簡，當道以重要人託，優容之。吳復請餉差來京，則又流連不返。小朵更爲覓函送之歸，此事蓋余親見之。

好事者每於春闈放榜之先，品評梨園子弟，而定其甲乙，謂之菊榜。優劣固由色藝，而家世尤爲重要。乙未狀元之朱素雲，戊戌狀元之王瑤卿，皆世家也。北京人好唱二簧，於是有票房之設，票友之稱。自親貴以至富厚家子弟之好

遊蕩者，往往入焉。有約謂之走票，清唱謂之坐唱，上妝謂之彩唱。既登臺，則內外場之犒資，皆由自備，往往因而破家。其技佳者約票，主人代備犒資，而暗有餽遺，謂之吃票。至於登臺賣藝，謂之下海。

因走票而破家者比比。最可怪者內務府員外文某，學戲不成，去而學前場之撒火彩者，蓋即戲中鬼神出場，必有人以松香裹紙撒出，火光一瞥者是也。學之數十年，技始成，而鉅萬之家破焉。又有吏部郎玉鼎丞者，世家子，學戲不成，憤而教其二女，遂負盛名，登臺而賣藝焉。日御一馬車，挾二女往返戲園，顧盼以自豪。

票友多學生淨，習花旦者殊鮮，以受侮太甚也。內行稱花旦之肯吃虧者曰捨豁。昔日票友有魏耀亭者，習花衫盡態極妍，其肯捨豁過於內行，羣呼之曰「魏耍命」。又有陳紫芳者，亦有名，年六十餘猶粉墨登場，扮五彩輿、梅龍鎮諸劇，修飾如好女子焉。

漢人走票者，率爲各部科房人家之子弟。有孫瑞卿者爲票友前輩，習青衣，

紫雲、頭斗輩，均祖法之。其後有喬蘊臣、貴俊卿均習生，皆道勝銀行夥友也。俊卿後遂棄本業，而賣藝於滬。

子弟班者，所唱爲八角鼓、快書、岔曲、單絃之類。昔有抓髻趙最有名，供奉宮中，以爲教習，某王惡之，乃轟出焉。立班之始，蓋富貴人家子弟，游手好閑，習爲娛樂，後乃走票，不取資，名之曰耗財賣臉。至於末流，遂成賤業。有奎弟老者，亦貴家子，易裝登臺，直似好女。所演有所謂摔鏡架，黛玉悲秋，花亭夜宿之類，皆靡靡之音也。單絃有德壽山，亦內府官，通文墨，後亦賣技爲活，善說聊齋，詞較雅馴。此外如榮劍塵，以八角鼓著名，皆子弟而下海者也。至快書之張某，大鼓之劉寶泉，則專門賣藝者。岔曲則已成廣陵散，音調最佳，昔曾聞刑部友人壽君歌一曲，至今思之。

京師雜技，併八角鼓班，統謂之雜耍。其中種種，如抖空鐘、耍花纜、踢毬子，皆有獨到之技。有說笑話者曰窮不怕，滑稽突梯，不可方物，蓋柳敬亭之流也。繼之曰萬人迷。又有百鳥張者，其學鳥獸音足以亂真。厥後有戲迷華子元

者，能學各名角之音調，非惟曲折畢肖，並其疵處，亦摹倣之，可怪也。

西城磚塔胡同之口袋底，昔爲內城藏嬌之所。一家不過二三人，門無雜賓，王公貴人，不能出城作狎游者趨焉。此中養女，必教以貴家相應之節，豪門妾媵，多取材於此，向無留髡之例。屋中多有密室，鏡檻迷春，劉阮不易入也。光緒辛卯間，瀾公管步軍，奏令驅除，多輟業者。庚子後，多移而樹幟城外，曰一善堂，曰雲香班，皆其變象。其中名花，皆受另一種之調教，固別有風範也。

外城曲院，多集於石頭胡同、王廣福斜街、小李紗帽胡同，分大中小三級。其上者月有大鼓書、影戲二次。客例須設宴，曰擺酒，實則僅果四盤，瓜子二碟，酒一壺，而價僅二金，犒十千。飛箋召妓曰叫條子，妓應招曰應條子，來但默坐，取盤中瓜子剝之，拋於桌上而已。少頃卽去，曰告假。客有所歡，雖日數往，不予以資。惟至有大鼓或影戲時，須舉行擺酒之典禮耳。

曲中呼夜度資曰炕錢，實則闕錢之誤也。宋元人謂冶游狎妓曰闕客，其語甚古。妓家又謂留客曰大日子，昔在秋曹，辦現審時，曾檢妓家賬冊，詢而識之。

妓女相晤，其密者輒用隱語相談。有所謂回宗語者，聞出於回教。有所謂切口語者，卽出於反切。格磔鉤輊，坐客聞而瞪視，但覺嚶嚶可愛耳。

院中備紙燈，客去必畀以一。客之至而命酒也，則高呼曰：『拿紙片來！』書條也。其去也，則呼曰：『燈籠！』故自昔有「得意一聲，傷心二字」之諺。

院中呼客之無賴者曰審痞，呼武侍衛之好生事者曰刺蝟，呼客之在行者曰有板眼，因失禮而動怒者曰挑眼。妓見生客，先視其鞋底，辨其外來與否。呼南方人曰「糟豆腐」，或曰「豆腐皮」。客之友曰「同幫」，同幫之友可借條而不可認識。其犯規而認識者，曰「割靴腰」。客有終日出入妓家，暑雨祁寒，不厭不倦，而並無目的者。至則或不見妓，但與鸚鵡夥坐談，忻然而去，少選復至。其時有二人焉，一曰陳天亮，一曰李八趙，諸妓家亦不甚厭之。

有春桂一子者，名妓也。樂亭富家子劉某眷之，太倉某相國子某亦與暱，恐爲劉所得，夜令崑崙奴盜以去。妓家控之官，劉亦有勢力，陰助之，嗾言官登白簡，竟奉嚴旨成欽案焉。而一子竟歸劉。

庚子後，游客流品漸雜，院中規制亦變用天津例。廢賣酒而曰上盤，客每至，必擲銀一圓，曰「盤子錢」。

南妓昔不多見。戊戌前唯口袋底有一人曰素蘭，廣陵產也，頗負時名。貴游子弟趨之若鶩，厥後賽金花北來，寓刑部後某街，暗招游客，陸鳳石相國惡之，命逐去。然庚子亂時，又復大張旗幟，爲南妓班頭。於是謝珊瑚、凌桂蓀輩相踵而至，南強遂凌北勝矣。

下駟曲院非士夫所可問津，俗所稱金魚池的婆娘，大致情形，略如陳大聲歌曲所述也。

校讀後記

校完「舊京瑣記」，前塵夢影，驀上心頭。我雖偶有失眠毛病，但是睡着了却很少做夢。不過年來北平已經數次入夢，可見此城對我一生影響之大。在台的北平舊友聚談，常常懷念古城的民情、風俗、語言、文化、名勝、古蹟、學校、公園、飲食等等，覺得無一不美，全中國找不到第二個比得上的城市。如果能將北平及郊區的市政建設再現代化，她將是世界上少數最好的城市之一，足稱中國之光。

我家原籍南京，從祖母一代搬到北京（祖父早逝，我們只見過他畫的四幅花鳥掛在家裏客廳牆上）。先父夏公仁虎，字蔚如。兄弟五人，大、二兩房人留守

南京老家，三、五兩房隨侍祖母到北京。三伯父做過那台縣知縣，他使我們兄弟印象最深的一件事，是每年歲末從任所回家過年，總帶回一大串銅制錢，這是我們玩捻捻轉兒最需要的東西。五叔是祖母最喜歡的么兒，也是她的熬烟技師。加上五嬸，他們對屋而居，共有三隻槍。我小時候天天看見他們一燈如豆，嘯傲烟霞，相信他們一定都很快樂，否則不會在過足癮以後，以對我們賜贈果餅爲樂。

父親行四，在學問事業方面都是兄弟中傑出的一位。把南京的家大部分北移也是他獨力經營的。北平政界、國學界稱他「蔚老」，一般社會尊爲「夏四爺」。他中過舉，選過國會議員；但以在清末的刑部、郵傳部、農工商部，及民初的國務院和財政部服務時間爲較長。

那時做官的人不像今天分工之細，執業之專。却是書讀得多，詩詞文章好的人才受敬重，因爲這才是出身的「正途」。以此宦海人士不廢吟詠，常常出版詩文集互贈。這種書古香古色，通常是木刻版，磁青面，白書簽，絲線裝，綾包角（這是中國書籍的一種特殊的裝訂形式，在國際書籍間顯得很突出，應當使用現

代材料與技術加以改良而保存下來）。沒有定價，也不送書店代售，或登廣告宣傳，因為那時的作者不認為書是可以賣的，一賣便俗。小時候常常看見印刷廠的人把一細一細的書版送回家，就知道是父親的書出版了。但是這樣的贈書自然不會印得多，送得廣。好書不能多流傳是一件可惜的事，對於發揚文化亦有未足。仍以今天的鉛印價售為較合於提倡之道。從前文人賣字畫文章，獨不售書，不知何故。

我於三十七年底攜家飛離北平，行色匆匆，除隨身衣物外什麼都沒帶出來。「舊京瑣記」是來台後複印自中央研究院藏本，本來影印出版既省錢又省事，但是沒有標點對讀者極不方便。因此「純文學」社決定加標點改排鉛字後出版。這像是把老酒裝在新瓶裡，但却無損於原有淳厚風味，反便於飲者。

加標點的工作，林文月女士，林良和柯劍星兩先生幫忙很多。他們平日都是寫好白話文的人，但是對於本書的琅琅上口的優美文言却讀得很高興。可知無論文言白話，只要寫得好，就會有讀者。近年有人反對白話文，却又寫不出好文言

文來，也是一件可悲的事情。標點於匆忙中爲之，如有未洽之處，當於再版中訂正。原書中錯字亦經訂正。有的字目下已有異解，當時或爲通用，則仍其舊。

本書「發凡」中說，所記多爲「里巷俳談，爲茶餘酒後遣悶之助」。引言中說「薦紳羞言，是曰瑣記」，當是謙詞，意指筆記爲小道，不登大雅之堂。其實父親一生博學多聞，加以文筆雅健，寫筆記體文章最合理想。所記既翔實可靠，足資研究當時民俗儀制者的參考。「發凡」中說「他日復有所憶，或更爲續記」。但是後來出版詩詞文集，傳奇、方志、通典等數十種，續記竟未着手，殊爲可惜。

舊京歷數百年爲帝王都，人文薈萃，多彩多姿，自本書可見一斑。爲紀念先人，重印「舊京瑣記」，也是表示對這個古都的不能忘懷。

何 凡 五十九年五月十一日

純文學出版社已出版叢書目錄(一)

書名	作者	平裝	精裝
• 近代中國作家與作品	蘇雪林 張秀亞 林海音	14元	24元
• 孟珠的旅程 (小說)	林 海 音	14元	24元
• 海那邊 (小說)	吉 錚	14元	24元
• 砂丘之女 (日本小說)	鍾 肇 政 譯	14元	24元
• 愛莎岡的女孩 (小說)	黃 娟	14元	24元
• 我底記憶 (近代中國作家與作品第二集)		14元	24元
• 阿貝桑傑士 (西班牙小說)	王 安 博 譯	14元	24元
• 改變歷史的書	彭 歌 譯	24元	35元
• 中國文學在日本	鄭 清 茂	24元	35元
• 學生老師 (小說)	楊 安 祥	20元	30元
• 薇薇的週記 (廣播劇本)	林 海 音	18元	28元
• 克勞黛 (美國小說)	胡 明 譯	14元	24元
• 知識的水庫	彭 歌	20元	30元
• 夏流 (日本得獎小說集)	朱 佩 蘭 譯	20元	30元
• 遙遠的海 (西班牙、中文對照詩集)	王 安 博 譯	20元	30元
• 雪山之旅 (遊記)	蔣鍾琇遺著	20元	30元
• 文學史上的大騙子	張 劍 鳴 譯	20元	30元
• 城南舊事 (短篇小說集)	林 海 音	20元	30元
• 權力的滋味 (長篇小說)	彭 歌 譯	24元	35元
• 迦陵談詞	葉 嘉 瑩	20元	30元
• 先知 (哲理散文詩)	王 季 慶 譯	20元	30元
• 少爺 (日本夏目漱石小說)	金 仲 達 譯	20元	30元
• 曉雲 (長篇小說)	林 海 音	20元	30元
• 滾滾遼河 (長篇小說)	紀 剛	35元	45元

純文學出版社已出版叢書目錄(二)

書名	作者	平裝	精裝
• 二姊的家信 (美國社會與生活)	朱梅先	20元	30元
• 舊京瑣記 (掌故)	枝巢子	20元	30元
• 愛情·社會·小說 (文藝評論)	夏志清	24元	35元
• 和亞丁談法國詩	程抱一	20元	30元
• 地 (短篇小說集)	張系國	20元	30元
• 包可華專欄 (第一集)	何凡譯	20元	30元
• 包可華專欄 (第二集)	何凡譯	20元	30元
• 小小說的寫作與欣賞	丁樹南譯	15元	25元
• 京都一年 (遊記)	林文月	20元	30元
• 柳樹塘 (長篇小說)	楊安祥	20元	30元
• 裸猿 (人類知識)	李廉鳳譯	20元	30元
• 五風集 (「玻璃墊上」專欄)	何凡	20元	30元
• 十雨集 (「玻璃墊上」專欄)	何凡	20元	30元
• 磊磊集 (「玻璃墊上」專欄)	何凡	20元	30元
• 落落集 (「玻璃墊上」專欄)	何凡	20元	30元
• 愛的故事 (長篇小說)	黃驤譯	20元	30元
• 一個美的故事 (長篇小說)	陳紹鵬譯	35元	50元
• 改變美國的書	彭歌譯	30元	45元
• 中國豆腐	林海音編	24元	35元
• 春風	林海音	20元	30元
• 和亞丁談里爾克	程抱一	20元	30元
• 波士頓紅豆 (中、短篇小說集)	楊安祥	24元	35元
• 窗 (小品文集)	何凡 林海音	24元	35元

純文學叢書 28

舊京瑣記

定價：平裝20元 精裝30元

作者 校集 子

出版者 純文學出版 社

發行所 純文學出版 社

台北市重慶南路三段廿七巷十二號

郵撥帳號：五三三三

電話：二四九二七

印刷者 皇冠印刷有限公司

台北市大理街四十二巷二號

總經銷 世界文物供應社

台北市重慶南路三段廿七巷五號

內政部登記證：內版台業字第一五七一號

中華民國五十九年五月初版

中華民國六十一年一月再版

· 如發現本書有破損或裝訂錯誤者
請寄回本社掉換。

